



過日集卷八姓氏

七言古

杜濬 見前

余思復 見前

汪琬 見前

龍燮 理侯江南望江人

申涵光 見前

吳兆騫 見前

陸繁昭 拒石浙江仁和人

紀映鍾 見前

宋徵輿 華亭人

章金牧 見前

許琪 蘊昭浙江烏程人

陳三島 見前

魏學渠 見前

毛蕃 穉賓浙江嘉善人

曹鑑徵 見前

周振藻 肅陶浙江嘉善人

曹鑑平 掌公浙江嘉善人

葉雷生 見前

吳聖窑

潘耒 見前

梅磊 見前

魏際瑞 見前

魏禮 見前

李雯 舒章江南華亭人

魏書 見前

何士燠 文若廣東順德人

何士域 耿菴廣東順德人

申繼揆 見前

方中履 素伯江南桐城人

駱復旦 見前

董說見前

高兆見前

王昊惟夏江南太倉人

王抃澤民江南太倉人

王撰異公江南太倉人

湯傳楹見前

戴遂孝見前

董以寧見前

李符見前

吳康侯定遠江南嘉定人

李良年見前

王紫綬見前

易學實見前

韓洽見前

毛牲見前

姜宸英見前

高承擬見前

高佑鈺見前

徐開任見前

丁棠發燕公浙江嘉善人

喬寅見前

冒丹書見前

黃周星見前

彭桂見前

章義民仲達江西南昌人

金德嘉見前

程封

呂士鶴見前

王攄見前

沈聖昭

于懋榮畏之浙江秀水人

黃之翰大宗江南山陽人

姚夢熊襄周江南太倉人

岳鰲圖武進江南人

楊无咎震百江南吳縣人

何嘉延奕美浙江山陰人

過日集卷八

七言古

杜濬

饑熱行戲為徐松之

寧都曾 燦青藜輯

徐生布衫重七斤盛夏著之天無雲不苦饑寒苦饑熱世上羅綺徒紛紛幾度逢君論風雅意致翩翩稱作者未似而今色枯槁艱辛豈不由戎馬君言饑熱且未憂瘦骨難勝五月裘由來苦重不苦熱編紵篇篇擁冰雪時松之方論定編紵集歸不得行

杜陵老翁歸不得黃河之水聞歎息赫蹏乞米長厚顏艱難轉不憂無食獨傷百日棲荒寺涼燠循環豈終極初來北部喚催

耕臨去西堂鳴促織中間毒熱不可當五月披裘心自側典盡
寒衣縫葛裳漫向人前炫要襪青氊鐵研今何在買薪賣到書
與墨老僧日日問我行使我低頭惟默塞積逋凌雜難具陳豈
第少渠僑賃直況復無端忤俗兒窮途苦澀添荆棘不知忍恥
復誰待平生故人萬夫特嘗將松相比君心嘗將山岳方君德
癩疥爲災祇妒予咫尺不得見顏色昨日緘書汗流頰今日題
詩淚霑臆老翁他事休再論歸飛願借扶搖力

柳冠道人歌

爲張子
虞山作

道人前年行萬里揆竒去飲珠江水歸來一物無所攜獨得柳
冠大如指柳冠華首日相親人見柳冠識道人翻恨此冠人易
識不教簪導入風塵道人吟詩追古調方戴此冠搜衆妙道人
彈琴求正聲方戴此冠遊太清道人飲酒復擊劔此冠岳岳增

光燄我愛道人真忘機海鷗石虎無是非我愛道人真急爰長
向龍興寺中走八公山南多第宅道人不作淮王客淮陰市上
多少年道人不賦絕交篇借問道人何砥礪所期不負柳冠意
莫言草木無心肝會見丹青閱人世嗟予嘗少冠竹皮近來老
秃無一絲柳冠何似無冠醜惟有頭上青天知

唐港耕人歌

黃河北岸飛黃沙倪生有田河水涯地名唐港濱瘠鹵耕種不
熟催科譁大兵四征復加派公庭使費紛如麻借問此田胡久
畱誰愛苦李求匏瓜倪生昔日有此田無米納課猶安然三二
年來家屢空安得飽飯還晏眠佃人走散老特歿田生白草如
窮邊倪生一朝長歎息驅我力作寧非天東鄰借錢縛西鄰借
桔槔南邨買黃犢北邨賣寶刀嗟爾倪生本詩豪惟知痛飲讀

離騷如何襍襪跣雙足犁鋤之具手自操倪生答言良有以童
僕忠良古無幾汗萊重使遭侵漁不如棄向黃河水唐港耕人
名亦佳既耕還讀原由已但求了得官家糧歲時婦子皆歡喜
君不見陶潛田舍有真趣飲酒篇篇見佳句尚嫌懶惰不躬耕
柔腸寫在閒情賦諸葛躬耕頗不凡多事他年答三顧畢生漢
賊終兩立豈若南陽守康瓠吁嗟乎倪生之先人功高未得圖
麒麟有子儒雅復若貧始知韜鈴詞賦兩俱錯對君且說田

家樂

余思復

牛舟行

巢湖春水淺不流水中羣僮騎羣牛回頭挽耜就我舟萬斤舟
駕三牛頭長鞭擊牛牛出矢搏浪翻泥十餘里鄰舟十牛或五
牛遠望疑龍更疑鬼前頭轉涸困泥淖力窮鞭折牛垂倒鹽車
泣馬古有人鳥啄牛瘡竟誰道沙旁日落雙栖鴉湖船散盡牛
還家連日水生春雨足犁田曳磴還將車船子班班車碌碌僮
父不憐老叢棘老牛有犢僮有兒南北行人代相續

汪琬

寄彭雲客同吳弘人作

去年君向燕山發江邊載酒傷離別胥臺幾樹楊花飛吹上征
鞍白如雪江邊此日又逢君遙望燕山祇暮雲驅車重過胥臺
路一見楊花空憶君

贈吳六益兼示李五王十一進士

詩三百篇不再得西京作者多雄才建安以來格稍降開元聲
調羣相推中間子美更殊絕筆勢獨起齊梁衰畫省長吟傍日
月草堂高臥驅風雷嗚呼子美豈易及近來模擬稍接跡後有

鄭繼之前有李獻吉正嘉之間稱第一先生後起復與匹波瀾
壯濶意興淡世人落落誰知心天球寶鼎清廟器黃鍾大呂明
堂音歌行出入頗頽放片言頓挫尤森沉意氣未肯輸少壯功
名豈得逃山林君不見關西李生調素雄濟南王郎思更工今
之才人有二子源流亦與先生同春光澹蕩長安陌先生有時
驅蹇出黃金臺下屢行吟關西濟南俱嘆息

再過慈仁寺

金元遺跡慈仁寺炎天騎馬曾一至松風颯颯吹客衣日暮銜
盃未能去重來此地天陰陰層巖積壑寒相侵舊時酒伴散已
盡落葉烏啼愁我心

題劉比部公猷蘇門圖歌

我聞劉郎少年善馳突上馬彎弓鳴霹靂左盤右射不可當好
手健兒爭辟易卽今白髮已蕭蕭猶欲奮草江淮檄昨朝過我
情相親坐飲一斛長安春與酣作畫用兵法筆陣縱橫皆入神
飛泉噴壑起晝雨老樹撐崖穿白雲君不見阮公臺孫登窟此
中形勝何突兀蒼藤怪石森然立山都叫號老猿擲劉郎點染
尤逼真使我對之悚心骨圖成拔劔吟秋風疑有蘇門嘯聲出
聞公猷移疾將往蘇門賦贈

劉郎欲投劾去隱蘇門山區區青墨綬棄擲如等閒蘇門自昔
多幽趣曾是孫登長嘯處山色遙連盤谷雲竹聲半落淇園雨
秧苗參差榭葉齊居人何減武陵溪閉門自有飛花入高枕常
聞過鳥啼劉郎乞身真不惡葛巾布袍差足樂案上頻抄內景
經爐中祇養長生藥女能織帛男能耕門生扶舁相隨行丈夫
適意且如此安用悠悠世上名

春燕篇

洛陽二月花如霰相逢處處多春燕可憐春燕如有情纔入淡
宮又淡院誰家宮院接芳菲陌上河邊烟草微已看乍掠蘼蕪
去又見斜衝柳絮飛高樓少婦情惆悵聞道燕來頻遠望玉軸
微寒翡翠簾銀鈎半掩流蘇帳此日徘徊繞夕陽飛來飛去斷
人腸雙雙對語黃金屋兩兩分棲白玉堂誰料繁華如轉轂舊
家門戶多翻覆畫棟惟餘鳥雀啼閒房但見狐狸宿回首明年
又暮春洛陽古道起黃塵故巢零落無歸燕寂莫蒿萊愁殺人

戲堆雪爲小山作歌示虞升

長安早春雪一尺紫陌泥深馬蹄沒驕陽不出浮雲陰惟有饑
鳥啼最劇玉遮主人本愛山偶然堆雪臨柴關孤巒窈窕羣壑
遠何異楞伽鄧尉間主人愛山兼愛客不妨對雪共浮白銀燭
未跋雪山殘倒却玉山非所惜

龍變

夜聽孫山人彈琴

平生懶聽朱門曲湖中小舫松間屋時共幽人弄絲竹孫登月
下抱琴來坐彈一曲心悠哉啼猿唳鶴清且哀指端妙響誰能
續明朝攜去秋江曲彈到秋空江水綠

憶昨行贈劉生

憶昨逢君白門下狐白之裘五花馬云是高陽舊酒徒十年落
魄稱儒者白門斜對長干路狂呼痛飲忘朝莫金叵羅浮琥珀
光鐵如意碎珊瑚樹當爐女兒紅錦韉大隄坐唱襄州歌百萬
纏頭一時盡典酣樂極歡情多一自飄零渺南北相思獨立空
江側秋月依然照別離春花漸恐無顏色須知人生高會稀銜

孟不醉今無歸

送張天放先生還金沙

太白有詩泣神鬼一字不入時人耳
文通有書汗馬牛一字不洗寒
儒愁古來文章每如此先生被褐歸
去來予亦閉門窮欲死男兒要在論
萬古眼底紛紛未足數

申涵光

匡廬吟問李饒州志清

汝從江右返正當秋雁分幾時
離却鄱江水衣裘尚帶匡山雲
我聞匡山天下絕飛泉百丈吹瓊雪
香爐五老沒層雲影入波濤峰勢折
聞有陸羽井又有遠公臺李白讀書心
所好至今魂魄應常來我曾東入吳揚帆
下西浙揚子太湖水滿眼吳山北固皆
丘垤十載匡廬幽夢結西江血滿鄱湖熱
兵戈遙隔子猷船汝若曾登可細說

邯鄲行

西風吹落葉颯颯邯鄲道邯鄲兵火後
人家生白草我聞邯鄲全盛時朱樓銀燭
光琉璃趙女臨窗調寶瑟樓前走馬黃金羈
卽今富貴皆安在惟有西山青不改君不見
遊俠子白日報仇飲都市亦不見爐邊倡華
袿鳳髻明月璫舊城寥落荆榛裏樓臺粉黛
皆茫茫城邊過客飛黃土城上憑臨日正午
照睂池畔落寒鴉不信此地曾歌舞揆雀沙
丘去不回霸圖銷歇更堪哀邯鄲之人思舊
主至今猶上武靈臺

吳兆騫

白頭宮女行

長安女尼妙音者本先帝時舊宮人國破後出居民間祝髮于北城之文殊菴與海昌相國居址切近常

出入相國家談宮中舊事及甲申三月事甚悉言十
九日夜漏欲盡先帝遍召內人命其出宮避賊是時
黃霧四塞對面不相見帝泣下沾襟六宮皆大哭又
言宮中侍姬都以青紗護髮外施釵釧自遭喪亂香
奩寶鈿悉爲人奪惟存青紗數幅猶昭陽舊物也今
年戊戌余以謫議羈身微纒而相國亦以他事下吏
因與其嗣君直方子長相見陰房愁坐言及妙音余
旣自傷失路復聞妙音之事感幽憤之莫陳泣佳人
之埋暮乃連綴其語作
爲長歌以傳於樂府云

長安女冠頭似雪曳地黃繩懸百結手執金經淚暗垂云是前
朝舊宮妾當年充選入披香倭墮新梳內殿粧低鬟自惜青蟲
小繫臂愁看絳縷長先皇御極方清宴宮中屢啟催花讌雲母
屏開出舞人水晶簾捲低歌扇歌舞年年樂事殊森沈寶幄挂
流蘇北宮漫閱魚龍戲東絹看臨蛺蝶圖圖史紛披間珠翠淡
宮鎮日長無事烏鵲書從女史傳鸞雛釵向昭儀賜昭儀明艷
獨承歡促坐金牀倚笑看帳掩九華長侍輦粧成七寶自凭闌

闌前羅綺紛成列御女才人幾分別玉墀草細打毬高珠箔花
淡吹管徹景福宮前細柳垂瓊軒不閉共追隨繡鏡纏髻嬌試
馬綠綈隱几倦彈碁春花秋月年年換掖庭寂莫腸堪斷素手
繙書教小王紅顏對食憐同伴一從羽檄擾秦川遂使官家少
晏眠五夜刺閨頻報警三春合殿罷開筵幾載天顏慘不樂中
宵獨坐占芒角砲火親開內教場詔書屢下文淵閣閣門封事
日紛紛督府潼關復覆軍幾部黃巾殘豫楚千羣青犢下宣雲
宣雲處處名城墮倒戈自啟居庸鎖闕下交馳告急書殿前望
斷平安火軍鋒倏忽逼神京一夜都人已數驚內苑左貂羣揖
盜團營飛騎半翻城城上弓刀爭內向蒼黃無復蓬萊仗獨御
金鞭閱九門空勞鐵券封諸將白馬青袍捲地來君王長嘆下
平臺口詔內人從避寇手持愛子共銜哀可憐十葉漢天子海

竭山崩竟如此復壁寧教伏后藏佩刀自割清河歿珠傷玉碎
滿層城宮車無那赤龍迎猶有黃門曾殉主豈知紫闥竟屯兵
自憐白首深宮住欲問家山渺歸路潛脫霓裳出九重却尋月
徑依雙樹一托香臺已十秋每談遺事自生愁室中漫禮金仙
席夢裏還隨玉輦遊惆悵生平遘陽九戒珠持遍甘衰朽天家
龍種尚飄零賤妾蛾眉亦何有我來故國幾沾翰摩挲銅狄北
風酸昭陽舊侍悲通德長樂姬人識佩蘭自古興亡堪太息淒
涼何處尋遺跡麥秀偏傷過客情柘枝獨下宮人泣晚樹沉沉
禁苑斜山川滿目思悲笳傷心欲到扶風市零落金箱憶漢家

陸繁昭

短歌行送潘新潭遊燕

少年不得意馳騁燕山月五月悲風號馬蹄清夜發關頭美酒

清且多送君一飲朱顏酡行逢故人暫傾倒日夜相思可奈何
執君手淚霑臆遠遊何用長相憶平生有仇會欲報腰下寶刀
脫未得

紀映鍾

東園看花歌

春風未踏東園路東園春色來無數問爾岸草何時生出門綠
遍前溪渡欲晴不晴飛雨絲欲鳴不鳴幽鳥疑遙看一片火齊
樹宕漾千頃琅玕陂白雲不動花灼灼晚烟勃起態綽約花邊
高閣寂無聲碧偃疎窗藏並萼慙叟龍鍾偶過橋買醉無錢行
帶索安得一龕倚花住朝見花暄莫花霧金尊明月莫教閒玉
女驕驄屢回顧燭龍銜燭無停時誰把黃金顏色鑄噫嘻杜老
難逢斛律斯東坡不見林家姬歸路沿城白日莫枕上遙遙憶

孤樹

宋徵輿

江南曲

明月下揚州青雲渡京口吳兒解棹舟吳女工垂手碧烟衫子
白雪翬臨花一笑桃花春開窗理髻照明水兩槳拍浪飄紅巾
憶昨秋風秣陵路吹到門前烏柏樹白雁紛紛千里來不見郎
舟下江去儂家高樓連畫閣長夜闌干對簾箔垂露如珠挂玉
釵雙星自帶秋河落秋河斜落歷陽西歷陽城北征馬嘶長干
作書寄京口今歲江頭歸不歸

我來闔閭城踏盡吳閶路手攜輕薄兒長揖要離墓要離墓草
野火燒一坏黃土孤堞高前臨青山後對水白雲來往風蕭蕭

擣衣篇

高秋八月涼風起日暮佳人心萬里白玉階前月似霜黃金廊
下天如水清砧哀響高入雲落葉啼螿誰共聞綺戶斜開殘寶
炬金爐半煖絕蘭熏蘭熏寶炬心不惜重向空房理刀尺回文
織就素手寒鴛被裁成紅淚滴滴殘紅淚入孤幃雙燕辭巢夜
半飛路逢遼海防秋士爲報君家正擣衣

章金牧

小長溝阻風歌

北風吹浪如山丘一夜水沒小長溝洪波滾滾海雲秋風欲
倒金銀樓榜客篙師生怨愁前飛黃鸝後青鸞仰射悲啾

啾行人視之雙淚流我行怪此且復休

戲乎丈夫從事

萬里遊會當詩成奪取當筵翡翠裘否則殺賊百萬成功名敕
賜飛龍居上頭春陵原嘗稱兄弟朱門邸第雄列侯胡爲落魄

無人收饑寒淚滿黑貂裘吾生如此苦復苦何況天寒河凍無
行舟無舟行不得仰天空惻惻彈鋏長歌歸去來山中黃獨尚
可食安能行坐長歎息

許琪

吳江曲

吳江女郎白如玉水晶簾幕傍溪綠玉簫春暖發朱脣故作陽
春斷腸曲桃花兩岸舟去遲不見笑掩團扇時回首江城小橋
西東風吹送伯勞啼

陳三島

中秋後一日南雅諸子燕集同賦

洞庭風起木葉黃梧桐庭院晚生涼十年不見山中人今夕當
歌樂未央雲母屏開碧玉樓仙人帳佩珊瑚鈎相思各採芙蓉
花相畱還繫木蘭舟長洲烏鵲繞樹飛月出銀河露未晞戍樓
鼓角吹銀箭曉星零墮光欲散百年離合在須臾坐逢知己莫
長歎騰觚飛爵起行觴華燈步障舒葯房木閣文簫思帝子玉
階瑤瑟憶娥皇娥皇帝子不可見涪陽秋水空茫茫攜手且操
青渚曲歸來並製芰荷裳

魏學渠

延津早發寄懷曹次典

去年同君浙水東對酒浩歌坐生風今年我行洛陽陌日暮投
鞭霜欲白三更還夢故園好村雞喔喔車行早僕夫整裝催出
門寒飈颯沓吹野草野草平蕪朝雉鳴荒城四面無人聲雪厚
水堅馬蹄滑思君不見參斗橫

毛蕃

代魚溪老翁答

魚溪老翁年七十手攜藜杖門前立雙眉淡鎖不復開見我南
來向我泣自言居此近百年宅旁數畝皆良田太平之歲農人
樂門外何曾聞剝啄翁年三十不入城鑿井耕田忘晦朔如今
官吏急追呼場圃未滌徵秋租舊租完罷新租急郡中早夜下
飛符大男入城完夏稅府吏又持鈞帖至咆哮怒目索晨餐沽
酒殺雞供一醉天公不肯恤農人淫雨霏霏浹九旬倉中有穀
成糠粃縣官鞭朴何時已近聞天子下明詔捐租往往飽胥吏
翁言及此良可悲我亦催科困極時

長安古意

長安三月柳如烟香車夾道爭喧闐曲巷新施錦步障康衢初
試鐵連錢帝里風光誰得似樓闕峩峩碧天裏鵲觀前旭日

明麒麟閣上莫烟紫玉龍繚繞建章宮鐵騎紛紜昆明水宮中
水畔泛龍舟樂府新歌清夜遊茵苜香風浮太液琉璃翠色滿
瀛洲銅盤玉露含仙掌金闕晴雲照翠裘延年女弟初相見傾
國傾城羣相羨爭持竹葉引羊車頻將紅粉勻嬌面螺黛欽頌
吳絳仙衣裾欲結趙飛燕五侯七貴競豪華金鞍寶玦最驕奢
名姬佐酒藏繡幕侍女彈箏出絳紗絳紗繡幕誇新麗黃金爲
堂玉爲砌誰傳丞相開東閣祇見將軍治西第別有親臣侍曉
班專權怙寵凌千官韓嫣馬上持金彈鄧通家裏賜銅山此日
笙歌滿九陌此日壺觴永今夕爐頭沽酒解金魚郊外尋春馳
玉勒尋春沽酒醉芳辰滿地飛花作錦茵三千食客皆珠履十
二金釵各舞翬何處長隄無纖柳何處紅樓無少婦朱絲繫腕
雙行纏陽春躡影小垂手銀燭熒熒徹夜闌嬌歌艷舞漏聲殘

竹葉梨花傾八斗錦瑟瑤琴試再彈娼家美女盛容飾千金一
笑良不惜青驄白馬綠衣郎雕弓寶劍黃衫客客子英雄意氣
殊酒酣耳熱歌烏烏已向小家聘碧玉還來陌上觀羅敷誰料
銅駝滿荆棘三月咸陽火不息別館離宮細草生雕闌繡柱寒
鴉集荒烟寂寂鎖朱門十室曾無一室存江頭寥落思公子路
旁困苦憶王孫繁華滿目今何在桑田頃刻成滄海衛霍功勳
姓氏湮金張貴戚門楣改已矣乎富貴由來成子虛塵埃營擾
一何愚嗚呼乃知塵埃營擾一何愚

曹鑑徵

冬青詞

會稽山頭暮雲紫會稽山下空流水寢殿虛無野寺中荒丘荆
棘寒烟裏金魚玉盃出泉宮椒漿麥飯悲無主寒食蕭條生野
烟高低古塚半成田數聲牧笛牛羊下夜夜冬青哭杜鵑

周振藻

董偃歌

延清館裏春不歛綠幘小兒鬪羅綺冷冷香風透石牀夜涼帳
捲琉璃紫火齊屏外散蘭膏銀釭焰上月欲高綠醺沉醉不知
曙笙歌徹旦雞欲號鮫文百萬半塵埃玉砌瓊盤幾度摧飛車
平樂春郊晚走馬東臯暮讌開嗟哉繁華寶主宅千金一擲渾
不惜館陶已歿漢殿灰百代空傳賣珠客

曹鑑平

長安上巳篇

二月驅車到燕市又見春光逢上巳氤氳細雨度輕風吹遍郊
原桃與李桃李芳菲三月時千門烟鎖綠楊枝夾道朱樓回繡

轂良辰祓禊泛金卮金卮繡轂青油幕層城日出歌鐘作象管
銀箏不暫停馳峯翠釜紛相錯多少遊人策紫駟芳郊十里暖
烟浮蹀躞錦韉垂匝匝葳蕤步障摩筵筵蘭皋迤邐花如霞乳
燕呢喃散青甸遲遲晴日麗西山剪剪春風臨上苑西山上苑
盛繁華碧草芊絲罩落霞衛霍爭持百寶扇金張競擁六萌車
人生富貴何能測及時行樂誰人識當歌對酒不盡歡屈首蓬
蒿亦何益此日風光政艷陽此時遊冶政徜徉釵拖赤鳳盤烏
髻翦染鵝黃墮馬粧只恐韶華不久待如雲車騎一朝改日斜
難返魯陽戈萬古惟留明月在明月依然照綺筵酣歌誰似永
和年欲採芳蘭隔江水越樹燕雲各一天揭來潦倒長安陌矯
首君門逃咫尺平津閣上每辭賓樓船帳中無揖客匹馬行將
去帝京漫天飛絮送歸程計到江南春色盡滿庭新綠亂啼鶯

葉雷生

舊縣歌

唐昭信縣去肝
胎三十里今廢

昭信縣西寒食路燕支湖上行人渡行人不歸寒食過湖外殘
陽隔江樹江樹參差愁脉脉日日牽衣上沙磧客夢長隨海燕
歸江路花開春月白遺老新耕江上沙少年經戰老天涯插田
歌裏分明道紅廟村邊是帝家

吳聖宙

北邙行

北邙山下哭聲苦洛陽城中沸歌舞昨日歌舞城中人今日淒
涼山下土山下土無今古白狐寒嘯髑髏烟青燐夜灼蓬科雨
英雄異代不知名高封大樹如掌平喪車麟麟日不絕後人來
葬前人穴後來葬者還應多可憐歌舞何時歇

潘耒

西湖曲

憶昔西湖全盛日，宋室江山纔半壁。歌臺舞榭足歡娛，鸞輿鳳蓋無消息。鳳蓋鸞輿望不回，更從天外起樓臺。錢塘江作銀溝繞，西子湖隨玉沼開。西湖佳麗世無比，萬戶千門俯烟水。車馬全移皓月邊，花柳都歸明鏡裏。鏡裏粧成對鏡鮮，月中看月倍增妍。誰家開戶無春色，何處逢春不可憐。可憐湖畔饒花鳥，能得春風幾回好。一夜江湖望不來，無數行宮沒荒草。荒草離離不足嗟，祇今風物屬誰家。西陵松柏樵蘇盡，愁向湖邊對月華。

梅磊

冬夜林茂之先輩過宿卽事二首

霜鴉滿天天氣昏，薄莫籬邊人叩門。披衣接杖辨顏色，蒼然乃是八十林叟來。江村自言衰老貧，到骨重以世亂愁。邇迤嚴冬絮破被，裹裂十日九日無饗飧。感君情至畱君宿，旋市瓜茶更炊粥。南京北京事空談，世廟神廟哭不足。景陽鐘聲夜半寒，北風颯颯吹窗竹。

土風澆薄古道廢，少年往往凌前輩。三墳五典束不觀，笙歌裘馬紛成隊。可知林叟廿年前，景陵石倉相後先。才名愈大身愈困，垂老凍饑長江邊。我恐後人復欺我，談經持杖常虛左。雞鳴曉起坐匡牀，雙手進湯還炙火。

魏際瑞

冬獵篇

黑火燒寒寒氣縮，紫焰潑天天色綠。健兒齊力馬齊足，韓盧手快鷹眼明。山豕人嗥狐兔哭，北風下吼水上撲。龜旒龍旂聲斛

斛霜鼓頤噐如擊木天鵝喇喇鉦斷續千人逐獸獸觸人枯草
熒煌眠血肉鑕刀撒雪四野蕭羽墮毛崩齊中鏃摘肝飲腦齒
吻丹脰脅分勢能眨目禽獸仰天怨天酷淚點琢冰砭赤玉合
圍分殺如世仇羔麀不得裛雌腹饜飫炙燔棄齒鬻歿者負肩
生縛束膏管淋瀝鞍韉腥吹笳擊鐙過城曲獨餘虎豹憑山林
聽其啗嚙殘麀鹿

魏禮

兩伏波祠

邳離之來拓遠疆新息之來輯舊土好大喜功歿其民寧非漢
武是光武光武身為漢子孫失其尺寸忝厥祖邳離不來草昧
荒新息不來誰識主數千百年義猶生春社秋社忙里鼓區區
卜海稱明神東坡伏波廟記云南北之濟海者以伏波為指南蓋必卜而後濟始無風濤之患九牛一

毛何足數嗚呼將軍將軍名海濱冷烟敗瓦長苔痕中原板蕩
聞不聞

乘月渡海歌

人生何為來渡海風惡浪惡翻心胸十里之外見雪白百里之
外聞滿衝水聳天低月如烟照我慘澹一艤艫浪拍船頭顛船
脚驚如擊鼓而騎龍蛟龍在下我在上眼無天水船無風為語
爾風爾欲吹我何處去但當識我意所之猗猗寂莫皆可同海
水搖蕩朱火紅乃見日出分西東

贈李元仲

官吏欲見如見龍野人欲問如扣鐘短衣溼履到君屋開口盡
言無從容呼童取水濯我足把箸飲泉大嚼肉知我此行不久
畱愁我雨雪行不速昔吾讀史曾有聞今吾對汝見其人酒酣

耳熱不自得如君豈可只論文夜重天寒月不白風雨聲中對
主客好花獨落污泥間男兒不遇真可惜

贈淮安張天中

君子受譽如受毀豪傑報恩如報仇丈夫磊落不得意吹燈夜
起看吳鉤淮陰市上日當午茶亭酒肆喧歌舞不見當時惡少
年何論千金老漂母天中意氣成春雲于我如逢異地親樓上
鐘聲對曉色門前荒草共黃昏輕舟自過燕齊水長河濁浪勢
千里秦梁不去空南來敝衣短髮見吾子

贈孫無言歸黃山

我聞黃山草木奇孫子先歸勞我思孫子後歸須我來我將數
衽以嗽詞請于黃帝一問之黃山以黃帝得名何謂垂衣裳而天下治
伶倫作律歛太和何愆陽互陰多乖夫天時隸首之算多寡短

長使後人不知大撓之甲子而空繫乎干支容成作曆闕閏以
為疑賢哲貞疾以弗瘳奚尚進岐伯而問醫諄曰黃帝既興涿
鹿之師何至今天象畱蚩尤之旗問首山之鼎何在借我併烹
戴地之四鰲奉佐帝卮我欲擊東西南北天之龍須佩鳥號以
為儀帝曰予既乘元御乎太虛予裔子孫作君作師如大海之
魚不可麗拘汝奚喋喋以聒予孫子聞之攘臂將須踞椒而軒
渠

黃河舟中

天風爭上河爭下我之乘船似乘馬風水緩急交勝負張帆落
帆不得住輕舟播蕩地勢連黃雲四塞欲吞天豈有神驅使倒
流徒令我船縮不前君不見黃河一道崑崙崑崙直萬里奔濤戒南
北哀哉河南亦是河北人天上之水界不得

李雯

吁嗟篇

吁嗟忝七尺自顧無行伍入淵不伐蛟登山不縛虎朝聽城頭角暮聽城頭鼓城頭鼓角催少年神武門前羅進賢自言今日朝天去不識城中老伏虔

魏書

紀聞

有序

凌雲山在清泰鄉之上游山直宜黃永豐與國諸縣聞有山野人於萬曆中始來居是山以山野不受結繩書契故呼為山野人譯其語言非廣之排狺切鬼必闕之濱海島所居民也其俗女勤而男墮以耕織自足亦不甚異人性以生食諸蟲毒及冬夏無寒熱異耳至於相安無競雖版籍毗反媿之二十年來種漸繁近以世亂稍稍徙去云山主亦有一二隨之遜者不可蹤跡矣

凌雲山縣數百里牙鼓靈峒中峰起險谿怪壑暗靈湫中有竇

龍潛淵底時時只見雲霧興微雨常飛晴明裏穆穆高木獻陰風白晝晦冥魑魅喜此中聞有山野人無識無知同鹿豕其族來從萬曆中種類難名聲嗟瘳腰縣籬篳各不同意儼以此標姓氏二家男女互為婚與世通姻遂為恥到處嘗土宜覘土厚薄為行止所居多至三五年土力既盡輒他徙徙日山山廣植杉殷勤便報山租禮居倚木石畧覆苫結芒遂安牀與几嬰兒常挂樹枝頭星風露月猶鉏理樹藝五穀種俱奇高嶺插禾不須水墾草無事敬人時但看花開為歲始俗喜虞機口腹貴亦常徒手格虎兕含血俛蟲食何疑往往并及蝮與蟻長幼自然合彝倫片言要約無回齒不受王章天地寬仁義禮智反可鄙吾常撫時動深思太古遺風不再矣安知山澤有黃農醇悶居然在于此兵寇充斥近年來厥類潛蹤絕首尾先幾復與

齊民殊反笑豪英束縛歿隱邪仙邪何處歸凌雲之雲生無已
何士壘

漁舟詞

日高一網破浪去日暮一笛衝烟來東西南北但隨意綠蘋紅
蓼相徘徊放歌風吹斷還續驚起鷓鴣鵲宿得魚換酒不換
錢醉擁壺瓶酣睡足

何士域

泊大孤塘

鄱陽湖水正湯湯一颿直走過南康依稀望見匡廬頂倏忽又
到大孤塘千山萬山雲乍斂涼月蒼蒼白一點須臾朔風打頭
來維舟且住依村店買魚沽酒試高歌石尤雖惡奈我何人生
泛泛已如此安得水國無風波噫嘻匡廬之下孤山側夜靜水
寒行不得客子但辦好夢魂或者乘風到鄉國

申繼揆

對酒歌贈若撫君如諸丈

酌君金叵羅聽我陽春歌笑坐東園花樹下天風吹柳翻如波
黃鸝隔葉似相勸欲醉未醉情已多良辰樂事殊非偶富貴功
名竟何有尊前但得酒如泉肘下何須印如斗男兒意氣頗粗
豪肯惜當爐脫錦袍高陽之徒不可作天地有意生吾曹人世
從來惜光景對酒鯨吞至酪酏向君歌罷兩忘言花底日斜睡
方醒

暮春虎丘口號

薔薇初放櫻桃熟新綠參差蔭成屋
贛州茉莉香滿船杜園蔬
筍肥于肉山門薄莫遲娉婷石場新月鳴絲竹何事老僧獨皺

眉採茶官吏方徵逐

方中履

霧中驢背看花

二月百花开滿路十里五里藏春霧行人驅驢行霧中眼前只見兩三樹行過十里五里來紅花白花隨路開可憐路在花樹裏不到三月花不止行行霧開見人家牆內是屋牆外花不知牆外花多少不知誰家花最好忽遇人家花下人對花歎息傷青春自言昔是種花者不覺白頭花樹下

駱復旦

夜坐聞濤贈弟

夜坐忽覺天地摧驚濤巨浪如奔雷星河漂沒雲將頽老蛟跳舞馮夷催高厓大谷相奔追上下四旁當語誰贈子遠遊行將

歸

董說

南村秋鬼謠

妖狐拜月霜花青髑髏騎馬空中行秋魂吹作塔鈴語叫斷東流一溪水鬼車曉喚精靈去綠燈移過江楓樹

築石塘

築石塘新軍來築塘未畢府帖催府帖下鄉吏打門南村竈冷行西村西村十家無一存破屋無門僅梁柱傳道新軍三日屯吏索空村遇樵父樵父言汝報府主五月不打插秧鼓眼中良田半荒土築塘攝役添冤苦君莫苦君不見塘岸油衣點簿書朝朝狼籍黃梅雨

高兆

高湯御史行

有序

湯公諱芬字芳侯嘉興人庚辰進士以說大帥遇害於福寧州寧德縣葉葬海濱越十五年壬寅其子騏字千里披荆榛刺血滴土得其骨負以歸

先皇歿國忠臣盡四海南奔那足問天隅流落故臺郎夜行獨出秦川郡繡衣滅裂垂兩肩傷心鐵印磨腰穿嬰城故人總開府樓江諸將空樓船樓船殺氣星如埽孤臣匍匐炎天道白頭已殉由拳城一身猶赴田橫島新市邯鄲各有君攀龍附鳳爭將軍怪爾能簪獬豸筆徒步來穿虎豹羣座上風雲叱咤起義兒負劔冠披靡魯連未解平原圍酈生已向歷城歿海天昏黃血模糊老翁手提七尺軀緼火登丘舉長鍤黃泥白草鳴妖狐同時節士聞太息纍纍積石橫胸臆行人那識御史墳飛沙已沒墓門棘此事虛無十五春中原大節久沉淪有子尚收文舉

獄招魂誰問汨羅津太白蒼蒼落日急孤兒脫繫思翁泣從亡奴僕歿凋零經過親串病呼吸辭家痛哭入南方足繭眼穿逐風霜寧陽城外知何處霍童山前空斷腸斷腸悠悠行路者自言家住荒丘下曾看生際玉貌身嘗騎歿後青驄馬嗚呼公子且莫哀縣官清野令風雷明朝下帖開邊障老兵負弩除草萊十里沙礫百里海波濤滄渰墟里改麻衣一望沙田號土人共指銀魚在重泉初開日月昏觀者辟易聲淚吞温序髭鬚飄颻動卻缺頭顱精爽存孤兒抱持眼流血血落草枯肝腸絕衣冠重裹柏榔新關山仍導烏臺節吁嗟乎湯公歸去石塚高黑頭孝子埽林皋可憐玉匣無消息春風何地長黃蒿

王昊

兵船行

陣雲壓城城昏黑羽檄分馳騎充斥颶風昨夜起鮫宮鬪艦千
羣更何益憶昔軍興催造船吳民髓竭無金錢刺史流汗縣令
哭老農含血遭笞鞭一朝連烽迷海道帆檣如山倏然倒旗鼓
虛張楊僕營艤艦已入田橫島沙溪十里飛黃埃人家門戶晝
不開橫刀躍馬滿街市海船方去官軍來君不見軍中健兒不
羞走盡是幽并好身手十村九村無人烟不掃鯨鯢掃雞狗

王 抃

舟中聞笛

關山笛裏誰家月吹向江頭照華髮梅花落盡楊柳生吳檣楚
施各不發五更月黑江水寒參差急調凌風湍君知旅客思家
久不見深閨語夜闌

王 撰

中秋山塘曲

秋江雨霽收烟霧畫橈齊向山塘路山塘簫鼓正喧闐貴客維
舟寺門樹舟中載酒嘗百罌妖姬狎客調竿笙岸旁公子雕鞍
上挽住青絲不肯行傳說連宵競開讌上等梨園選應遍歌按
霓裳舊譜翻舞飄翠帶新粧炫珠簾露腕袖輕旋蕩子迴眸拾
墜鈿吳兒生歎歡場裏那管人間水早年君不見野漲瀾天浸
茆屋十家五家相向哭催科大吏下江南且辦官糧來顧曲

湯傳楹

野老哀

麥疇漲綠雨中起濕風吹愁散千里沿溪碧草啼曉烟春去江
南鷓鴣歎暖黃百條柳脫綿古陰一帶榆撒錢始知天公恩濫
用驅儂妻子填饑寒拾綿製衣不堪著拾錢買粟不堪嚼惟將

白骨變黃金差贖荒城返魂藥塵霾掃天日月寐新鬼啾啾人
醉醉錦帆之水長洲花化作今朝老夫淚

戴逵孝

憶觀莊

往年一日不見泣且歌邇來數年不見心奈何大塊之上荆棘
滿青天之下浮雲多我爾鬚眉落落天地間安能隨人步履長
蹉跎天涯海角顏色老不知新人故人顏色孰醜好折我匣中
劍焚我囊中草男兒世上無知心不若山林就枯槁山有君兮
河有伯思君不見淚沾臆

董以寧

袁重其以其年所贈長歌索和漫成

醉來碎擊珊瑚樹座上彈箏箏且住我昔江南遊俠兒出入黃

鞞鶴尾袴壯心早願勒燕然歸來便欲求神仙關門棄繻非異
日子晉吹笙本少年結交便飲爐頭酒爐頭女兒好身手道上
相逢短老翁陸博酣歌無不有豈知往事徒乖張數奇不遇漢
高皇豈知上書仍落拓酒徒還在舊高陽世事悠悠等射覆不
如高唱江南曲斃裘塵柄嘯胡牀隱囊紗帽彈碁局今歲江南
正落花花時嬾載碧油車蒯緱落拓澄江道相逢握手空咨嗟
君不聽城頭月落烏啼苦君不見經天明月沈珠浦同是悲歌
慷慨人愁多且看俞兒舞腰下何須大宛刀尊前安用五陵豪
與君且作銀牀客醉看山中桂樹高歌罷陳生亦潦倒眼中不
但袁生老

放生池歌爲冒辟疆賦

我聞東臯冒大夫鑿池百丈成清湖前臨水繪菴遙對小山吾

亭名大夫昔時臨此池抽簪初製遂初衣高朋共集芙蓉府有時
曲水共題詩此日池亭方極盛清池起處遊魚聽大魚洋洋紅
鬣飛小魚育育朱闌映與人無爭亦無患川觀頗盡豪梁興誰
知盛衰會有時四十年來事總非卽在此魚數亦阨東隣桔槔
澤苦渴入釜誰爲解網恩寄書應念過河泣大夫子孫才且賢
追思往事心惘然有客聞之彈鋏前請君且食槎頭鱖君不見
昆明太液稱濯錦蓮房菰米波漂盡又不見王濬樓船下大江
江中鍊鎖餘紅燼

李符

秋夜宿慧建寺見一老僧頭白如雪聲音如女子異而
詢之知爲沐黔國故宮監也遂叩其遺事爲余道之
甚悉聽畢愴然故述長句

金風瑟瑟涼秋至客子夜宿慧建寺白頭老僧夜不眠爲我淡
談黔國事自言乃是刑餘身少小曾爲宮裏人曲房深苑逶迤
入皓齒明眸歌舞頻玉鳳銜鈴聞異響金龍吐佩承香塵第宅
非由一朝建分茅始自功臣宴鐵券頻頒朱邸門璽書數下明
光殿二王一侯九國公尚有將軍不襲封子孫傳位十數世勳
爵食祿三千鍾武僖之後愛文詞徼外烽烟靜一時滇池長讌
書生客阿瓦猶傳都督詩

阿瓦國王每夏五月以舟師會諸小國于江上都督沐璘作詩曰蛇首樓

船十丈長船頭鑿鼓樂笙簧篙師百櫓齊搖去阿瓦城邊水似湯滇人至今能誦之崇禎年中亂離始臨

安長官謀不軌倉卒橫戈尊俎間須臾拔劍宮門裏從官衛士
不敢前樓臺灰燼鶯花灰陳焦夫人竄西門一旦自焚普吉邨
可憐兩世金閨質化作千年玉女魂上公初遁瀾滄遠一去緬
彝不復返曾聞就義歿從容至今傳說多哀輓聽君說罷涕交

流一門盡節真難求三百年來事銷歇却恨當時沙定州獨倚
繩牀三太息珠斗闌干月將入篝燈黯黯不能眠清夜如聞鬼
神泣

吳康侯

何生行

何生酒酣拔劍仰天呼虬鬚戟立手啖生頭顱袖裏椎鐵換兵
符鄂公鞭節繡血光模糊啞啞叱咤隸使老亞夫何況淡衣大
帶諸腐儒自言家世本中吳兒童恥受章句書睂目如畫雪照
膚遊俠黃公舊酒壚接丸借客浮江湖要離塚上酌酒歌嗚嗚
少年杖策遊京都貴戚池臺映珊瑚王孫樓閣明遷逾丁丁漏
水注金壺香雲香雨暖流蘇金翠烟花十二衢宮中聖人大賜
酺闔外將軍醉鷓鴣五陵裘馬真畫圖桑田碧海何須與落葉
秋風哀蟬枯鼎湖夜雨攀龍鬚曲江野老咽新蒲殘照園陵春
草蕪黃金臺上夜啼烏開元供奉今有無十年蹙蹙空荒廬我
來燕市覓狗屠何生一飲一石還呼盧羽聲慷慨日西徂爲我
高唱大江東去山月低何生何生真我徒

李良年

官馬行

北方高涼多種麥麥若不登農絕食何爲却種官路側日操豚
蹄祝南岡馬來但趨路中央鋤我歲入如茨梁嗟爾何愚抑何
賣馬不食麥天雨粟不若持竿備驅逐錦衣使者來如雲駸駸
歛忽數十羣老農哀呼馬不聞朝田青青暮荒土縣符催租急
如火田家明年祀馬祖

程農部畱宿因憶戊申之歲同屈翁山何不偕于此歡

通日集卷八
三
宴累月忽忽二載矣作詩呈農部需便寄二子

我辭金陵道復作長安客長安九月雪初霽垂楊亂落金溝側
廣州館前水作花偶隨殘日過西斜司農埽徑晚開甕月俸仍
分到酒家往事重論夜將半疎簾別啟藏書館忽憶春燈話石
牀故人何屈今星散嶺樹迢迢萬里心更邀秋月弄瑤琴還將
越嶠仙人曲并入江南遊子吟

題穴人詩後

三唐已渺典型在儼若金石萬古垂有明晚葉吁可怪棄厥根
本尋其枝小兒開口笑宋詩豈知良工意慘澹能事不貴師藩
籬江南僕射最清越坐我曉峽聽參差自餘西崑鬪織冶掩抑
百味誰能訾孤山先生野鶴姿北有鉅野王元之一顧埽絕粉
與脂揄揚真仁得歐九詞源駛穩開漣漪蘇梅有才宦不達正

可犄角歡同時或弄水石去官後或製錦字西南夷梅古而澹
蘇磊砢二公標許非人知循其涯者南陽維餘子不足當挺蠡
是時子瞻出峨眉脫轡千里難爲羈豫章對樹中原旗以我壁
壘當神奇同宮異響臆所取宛丘雞肋皆予師後山吟榻未可
哂一字不肯前人隨臨川淮海且高束太欠跌宕猶矜持當年
碁布十數公更愛丹稜兼具茨自從赤羽限天塹太乙獨照江
之陞翻然詞筆走光怪不與王氣相推移尤楊范陸接袵出排
壓半壁聲名馳世于游也無間然石湖特妙田家詞新安夫子
謝雕刻乃是四始元音遺宣獻石屏各佳手病翁冰雪無點疵
甌江秀色可攬結四靈窈窕揚風規布衣而工知者誰富春灘
頭歌且悲短竹欲碎愁軍諮遺編一束山鬼泣百年棄擲輕蛛
絲嗚呼往哲秋雲高媿從井底論妍媸少小只解弄柔翰鼓柁

欲涉無津涯先人藏書一萬卷劫火到處寧吾私擬拋生事閱
故簡手欲繕輯力已疲今日何日見此本明珠照眼紛纍纍賤
子作頌二十七後人一一須攀追錦幪香襲且歸矣茲事定可
千秋期作詩聊寄耳食者蚍蜉撼樹將奚爲

見盆中水仙有所感

水仙以水名託根非洲復非渚可惜寒花只暫香梅前雪後淡
憐汝綠蓋軟泥糝麴塵却立三莖如好女靜掩窗紗几上看憶

著兒時舊園圃蘭南蕙北渠中央椶葉橋邊曾作塲

椶葉橋水
仙塲皆別

業中先
人手葺主人別此二十秋想見幽芳泣寒雨由來三萬六千日

花落花開等羈旅水仙况是一小草何用看花輒懷土君不見
東家丘墓入西邨燕子營巢向華門心傷二百年來事舊塲凋
殘不足論

王紫綬

大梁宮人行

茅店朔風籬戶破土榻夜寒捫足坐苦耳淒音無倦時始猶絮
絮後轉大自從垂髻入王宮天下藩封數沛中五方食貨舟車
便四海衣裳冠蓋通宮中日夜聞簫鼓記得憲王春樂府暗攜
玉尺比珊瑚閒向金籠教鸚鵡鰲山城市結丹丘步輦隨登宣
德樓三千朱履高門隘十二雕闌夾道稠桃笙葵扇泥金虎藏
冰七十二王所水晶簾映玻璃杯玳瑁簪翻蛺蝶譜明月離離
海嶠來翡翠凌空飛閣開艮岳清鐘飄鐵堦隄錦纜隱繁臺
最是梁園雪欲滿雜遝喧貂氣暖錦繡徧園上樹攬榆初
動帳中管教坊入直殿西頭私言闌闔見風流白鼻騮隨銀鑿
落青油幕轉玉搔頭五門廻斜五十里家家日在歌聲裏銅鏤

熠燿侯羸關屈戌輝煌朱亥市晨昏四季賣花天蹴鞠戎戲首
鞦韆帝子鬪雞輸寶玦妖童走馬失金鞭大家園亭傲宋作水
陸年年花石過十番絲竹五侯眠九陌腥羶七貴唾寒食中原
十月朝士女踏壞金梁橋連帷羅袂肩相並條脫香巾步自搖
辛巳闖寇春薄汴血濺西城六日戰竊符虛擬魏家軍飛鏃哄
傳雷將面冬來卷土壓東城雉堞烽高百里營雲梯萬架星辰
亂鐵礮千家風雨鳴前番射中闖賊眼幕府上功雙綬縮此番
一月用火攻崩頽埤堦餘三版三版一月不可侵二百年來見
人心周藩朱提紅標記一級償以五十金賊營今年四野蔽秣
馬取禾作家計日日巾幗罵將軍城上鏡吹門市閉麥青卽來
待麥黃城上隄上坐相望此時河南無乾土左鎮擁兵踞武昌
富家積金不積穀倉倉糶盡敞空屋灰者已果生者腹生者豈
有完骨肉官府下令曰搜糧抽刀控箭入人房搜之烏有曰蠲
助珠玉還載粟橐囊五月開門放人出六月塞門防人逸將軍
密計撫軍領肥瘠皆堪充軍實銀滿一杯米一杯豪家潛向老
兵謀老兵米有肉更有私下屠人公賣牛兵將三日索一賜窮
後周王夜不寐粟紅已罄神宗年鈔黑猶題洪武字百官數月
城上棲鼠雀羣空馬妾啼太守骨立麴爲糜方伯髦年柏作壑
或啜綿子或啖紙四府自飽三府灰將軍連日宰駱駝愁殺梨
園諸弟子中官朝暮啟王時說盡民間瑣屑詞朽車蓋伴羊裘
煮溷水蟲爲魚子炊八月晝夜連陰雨城下水從城上取九月
忽傳黃河遷大明十七歲壬午黑雲未散黃雲生一夜千鐘萬
鐘聲纔道蛟龍鬪北郭旋教樓市收東京匆匆從駕壽山上窪
處洪濤淡七丈王家僅餘數尺城女牆缺溢如破盜馮夷怒叫

天吳趨鐘樓鼓樓爭須臾只恐壽山淪水底相約結帶理珠襦
文武將士呼舟渡舟子操舟左右顧百官在後王在前法度不
行行賄賂舟開遙指古寺宰相國賜吻百人號水面忽驚砲火
響賊後漸欲近城壕撫軍聞之額頻蹙將軍第呼渡河速新河
已過過舊河舊河之水沒車幅王駕倉皇次延津然燈白屋點
妃嬪低頭拭淚中官歎幾回錯喚舊宮人左右紛言鄴下好昨
日王駕離酸棗一騎雙乘騎又稀妾身獨走沙門道夜來和衣
宿荒村夢裏猶入厚載門乍醒不知同伴盡失聲倩視臂間痕
聞道鄴城纔三舍妾身到應是明夜未到預憐望西陵銅雀惟
見漳河下非關老大恨天涯芳草王孫何處家淒音未斷風漸
加颯颯茅店生霜華噫爾宮人莫惆悵余亦滿身黃河浪說盡
汴梁遺恨多河北天寒雞早唱

柳園行

柳園下馬無一柳河干老人衣露肘却指夕陽向客言瓦上殘
暉蒼鼠走此地豪華記昔年瑟瑟珠簾樹杪懸宅第雲霄陵衛
霍阡陌縱橫邁竇田五蘊七寶出內賜晨興一箸萬錢費門臨
白馬大王風家接陳橋天子氣梁王賓客許追陪一水舟車日
幾迴雪盡呼鷹遊兔苑酒酣攜妓上吹臺詔書初膺輦翟選闈
闔中開納鳳輦大練母儀領六宮秋月春花顰笑淺乙丙之間
重廠臣楊左肉銷北市塵生祠火急封疆吏緹騎株連偶語人
定輿夫人曰奉聖婕妤昭儀寵莫並旨承樊嬖使令便侯及呂
嬖封爵盛巧竊威福附貂璫當防冷眼覷昭陽暗引羊車回永
巷互飛蜚語中椒房外家頓失金吾貴大官漸減掖庭味燈前
良姊伴中官灞上將軍逢醉尉故劍霜寒氣不騰伏后蕭牆百

處增上公已越九千歲妖媪寧知十二陵戊辰水消日赫赫太
后坐受新皇冊黨錮最憐戚晚賢手救恩加太康伯秦寇重來
圍汴京下盡河南七十城揭竿蔽野龍蛇亂夜火隔河霹靂鳴
黃流破城如破竹舟子操舟上人屋男攀女挽勢欲沉歸去舟
中指可掬甲申日墜燕雲垂額龍血叫雌雄隨珥簪雜還胭脂
井絃管淒涼凝碧池長信上陽人俱散三木公卿旬未盥覆巢
北海小兒悲牽犬東門老父歎昨日魏其今武安擒虎軍中弔
唁難昭陵青塚憑誰問人世空餘賈佩蘭掃眉宮禁來真主瘴
雨蠻烟開幕府征滇貔虎次朱仙戍粵駱駝過妹土連錢塵滾
鐵浮圖匝匝日明金僕姑綺疏閣壞鈴聲啞繡錯田荒麥穗枯
桂叢移作他山樹御碑摩向誰家墓雨摧碧瓦鴛鴦飛月落雕
梁狐鼯住自從河口決荆隆鯨也九載鮮成功秦皇鞭石神人
怒漢室泥沙壁馬空河使下令雷霆吼兩岸蕭蕭星在鬻隋隄
采罄輸黃金瓠子丁亡鎖白首中原八郡零一州更番河署起
高樓包工白粲連車解折埽朱提計畝收是時曾因廝役入十
隊紅妝樓上立故遲檀板宰官領潛倚洞簫嫠婦泣前年徼倖
合龍門河夫雖罷隄夫存慣看月華銜鐵堦飽嘗雪片舞梁園
河開河塞終無已帳殿往回獵馬喜夷門關市已全非鉤弋妝
樓今若此客猶未語河忽高浪湧沙黃風怒號欲共老人尋往
事數聲野雉起蓬蒿

易學實

自蕘堂歸槎路山居見屋後桃花

去年亂亟走嶺西二月桃花爛滿谿大婦看花淡太息小婦淒
迷淺黛低今年復走南山隈却報羣騎山北來溪山大潭龍蛇

蟄我恐藏之驚雲雷空村日出高峰雪十日不令柴門開歸來
屋角見桃花獨倚短牆交竹斜春光不肯透城郭正月茅堂生
曉霞

韓洽

對酒行

白楊樹冷鳥聲咽屋底鳴絃淒欲絕玉箸瓊脂不耐愁金鞍錦
跨偏輕別主人布被覆青氊夜夜牀頭獨爾眠不惜淡尊與君
酌正值囊無沽酒錢興來欲共爐頭醉典却鷄裘君不至獨酌
逡巡不下喉紅爐畫盡相思字

揖山樓

高樓三面青山立山人愛山揖山入一時相對忘主賓佳樹佳
花咸翕集青山斷處是湖光風濤萬頃遙相望高帆白鳥互明
沒別作平臺坐秋月山人愛山兼愛文壁間題吼紛烟雲我來
一揖不相拒知余亦是青山侶

岳墳

斧斤日出錢塘門冢上松楸無復存馬鬣荒涼髑髏泣子孫飲
恨徒聲吞栖霞嶺畔南枝墓犯者倉皇輒僵仆健兒相戒莫敢
窺蒼翠森然獨如故武穆英靈性自殊嗟哉所見太區區趙家
社稷今安在却愛墳前樹數株

公無渡河

大波如山小如屋連檣巨舟誰敢觸被髮狂夫汝何欲有身不
歿七寸木褰裳涉險如平陸公今一渡何時復河伯筵前厭人
肉殘膏畱潤河魚腹箜篌之聲淒斷續寡妻旦旦河邊哭

毛甡

短歌

廣陵城下波粼粼吳家少女名阿真桃花爲面月爲影當軒一
顧愁行人春桑初發采桑去五馬城南使君住烟絲漠漠吹碧
林前路踟躕日將暮鴛鴦雙飛江水傍蓮枝已折蓮絲長他時
自有連根藕莫道空聞蓮子香

飲廣陵舊城酒壚同胡五舍人張十四判官醉後作

黃花開盡朔風起買酒揚州舊城裏沿城數里有狹斜十五當
壚對梧子溝頭水淺不照衣開元才子旗亭稀江南雁歸不識
路日暮且來江北飛

攜條兒宿謝墩書感

謝郎東墅春融融春鳩日啼高柳中小蠻朝妝裏花葉開箱自
揀春衫紅烏衣桁南絲波繞簫鼓盈船度春曉不惜聽歌都護

哀但道彈箏貴官好過江遊客遊且吟草堂無復畱山陰小蠻
空上江南路欲賦江南傷客心

逢姜九飲

昔年遇爾春城東山前十里桃花紅今年逢君值春雨幾樹桐
花落寒塢壚頭汗漫傾酒卮與君曾賦春遊詞夏王陵東南鎮
西紅妝灼灼如朝曦朝行采花暮歸遲綠楊鶯語春晝迷可憐
春晝鶯語澀君欲行春待春及君來能宿酤酒家爲我且醉山
桐花

別戴大金黃大世貴

淮陰城南有飛雁游子窮冬返鄉縣雪滿孤舟戀戴逵波連千
頃思黃憲寒風截截霜滿裾臨行出入還躊躇傾尊不盡此時
語開械頻對他年書淮流一曲下江滸渺渺長帆去西楚何處

思君最愴神三月江南棟花雨

丹陽城下作簡郡司馬

丹陽城裏秋楊綠不見當時舊劉穆鐵甕徒懸鶴鵲棲金盤不貯檳榔肉峩雙闕古郡臺丹陽司馬今奇才方輿偶屈陳蕃坐錦幘真看謝奕來高牙傍海發葭鼓萬疊寒濤散艘艣典兵自昔重南徐雄鎮只今推北府江東遊子歸較遲登樓賦罷將從誰重來丁卯橋邊路欲把垂楊幾度思

飲郭將軍竹下

萬竿修竹臨清流竹中畱客郭細侯短簫橫笛向風發居然身在蓬瀛洲行廚斫桂煮芍藥玉甕桃花泛清酪近部天低散馬牛空亭雨過飛鳥鵲酒酣倒載折角巾繡衣卸出紅麒麟將軍本是蒼山客不數悠悠世上人

姜宸英

題南齊旌表華孝子小像 有序

孝子諱寶父豪晉義熙末成長安時孝子年八歲臨別謂曰須我還當為汝上頭既長安陷孝子七十不婚冠有問者輒號慟彌日按史劉裕以義熙十三年秋八月至潼關命王鎮惡大破姚丕軍遂入長安其年十二月裕將東還三秦父老留之不得以弱子義真都督雍涼秦州軍事畱鎮之豪成長安當以此時既而沈田子以掩殺王鎮惡伏誅長史王修被讒死羣情解體夏王勃勃遂進據咸陽走義真積人頭為京觀號謂醜臺此十四年十一月事也豪豈以此時陷沒而不得還耶從此中原分裂生靈塗炭于戰爭又百餘年狀後合而為一其遺禍烈矣劉裕之罪可勝誅乎而孝子之所痛者特其父也狀自古纂竊之臣若王莽懿操父子俱未嘗親弑其故主也至零陵賊殺自後禪授之際習以為常裕之子孫亦嘗身罹其毒而君臣之道苦矣獨孝子終身思父不婚冠此其所關于人倫甚大蓋與晉徵士之風異事而同軌者也嗚呼忠孝名節者國之大綱大常而人類之所以不滅顧失之上而得之于下豈不尤可貴重與南齊時同郡有薛天生劉懷胤兄弟皆以孝行旌然予獨以孝子之所遇有足感者故疏其事于象左且繫

之以詩

平朔門前萬馬迴長安歡動聲疾雷羌酋反接渡江來南朝太尉作事垂心圖九錫苦欲回十三兒子何為哉兩雄攫拏鬪不開忠臣斷頭起禍胚赫連潰師山崩摧參軍馬背馱嬰孩草間求活真駑才人頭作山高崔嵬三軍同時橫暴腮傷心極望髑髏臺髑髏臺上悠悠魂七十無家難具論一朝旌旗忽南卷百年星日當晝昏小人憶父心煩冤父老哭君聲暗吞白頭舉事何紛紜冲平陵畔啼夜鶻君親大義死不泯赫哉孝子誰等倫東籬之外五柳門宋齊轉眼俱埃塵忠孝歷劫無沈淪君不見此圖愴况正氣存

高承埏

烈皇帝御書歌二首

御書乃宣德箋詩云未央鐘連曙光生隱隱初聞柳外鶯風靜御爐香篆細天高斧座哀衣明螭頭階擁黃麾伏豹尾班聯白玉珩最喜及時勤庶政蒼蠅聲裏問雞鳴後有御書丙子春賜戚臣有福蓋書先臣章文懿懋詩以賜寧德長公主駙馬都慰劉有福也上用御寶其文曰大明崇禎皇帝萬幾餘暇之筆又御書折疊扇詩云蕭蕭翠竹野人家靜裏經春玩物華綠樹千章啼百舌香風吹盡紫藤華上用御寶其文曰崇禎御筆

先皇睿智誠奕奕高文典冊同圭璧卽如書法邁鍾王能令觀者盡辟易一自龍髯去鼎湖累朝墨寶痛狼籍剡藤塵封亦已久忽墮吳門練光白委諸艸莽人莫知如龍爪鸞一翮孤臣捧視淚沾襟不違天顏猶咫尺何以薦之古錦囊敬收寶積敷重席

吁嗟小臣受君恩功在封疆天語溫自遷安令調寶城固守全城當路尼之後仍奉溫旨忽逢陽九兼百六焚獵乾坤無一存回思秉國者誰氏獨使艱

難貽至尊宵旰之暇亦游藝得留宸翰清心魂周鼎商彝何足
道唐碑晉帖猶兒孫含悲捧入鳴鳩署永藏宗祏垂後昆告誠
在笥勿輕啓觸之恐有雲雷奔

高佑鈜

都門贈王濟之兼似令子牖聞

燕臺有客殊惆悵挾策承明不得上待詔無能金馬門停車久
在烏衣巷烏衣主人才且賢壁間一榻常高懸爲我開軒坐月
下與君酌酒對花前君家寶繪多古意大令風流喜未墜臨池
自愛寫蘭亭揮塵不辭衣薜荔薜荔悠然絕世塵玉樹瓊林更
照人壘棋豈用數蠟鳳映月原知是石麋主人卜築長安道不
識五陵諸俠少醉來和我無魚歌興至聞君鸞鳳笑易水風沙
薊北雲金鈎芳艸亂斜曛鱸膾蓴絲不足道丹楓白雁詎堪聞

王西樵考功阮亭儀制招諸同人上元雅集

昨夜天街月如水遊人寥閨紅塵裏今夜華堂燈似月相逢不
厭清尊設長安邇日厭繁華不教火樹放銀華賜酺漫問鰲山
宴傳柑且醉瑯琊家瑯琊兄弟推二妙考功儀曹竝清要禁內
流傳錢起詩宮娥解唱微之調良宵折簡邀倡酌滿座清言月
影留西園冠蓋無俗駕南皮賓客皆名流愧我風塵愁到處馬
蹄幾踏長安路佳晨獨客不勝情相逢幸覩三珠樹半銷蠟炬
落殘梅漸覺嚴城漏鼓催聞道金吾將禁夜燈前把前莫徘徊
歸路星橋浮碧漢香車寶馬俱飄散耳邊但聽伊涼州一曲關
山動愁歎

徐開任

送仲兄司理邵陵

麥秋四月南風起送兄迢迢渡濟水此地新經烽火來萬井蕭
條生荆杞憶昔邵陵全盛時桐封愛子萬年枝宮中爭唱銅鞮
曲陌上時吟估客詞一朝物換人亦改珉王宮闕無復在北渚
新愁落照中蒼梧舊恨秋雲外執手相看杯酒前離魂嘗傍洞
庭船驚猿帶雨啼寒夜征馬追風踏暮天丈夫不灑離別淚天
涯知己若同氣此行莫負桃源心洞中雞犬與時異

丁棠發

春泛鴛鴦河

鴛湖三月春光暮東風吹綠垂楊渡搖曳清波野外舟迷離芳
艸堤邊路路遠橫塘入畫圖萬家烟火接平蕪斜陽傍晚光明
滅遠樹含晴晝有無憶昔樓成鴛水曲亭臺百尺圍新綠舞蜨
高低繞盡欄名園到處深花竹載酒蘭橈曲榭西風光何似若
耶溪銀箏翻譜調鶯語寶瑟傳聲落燕泥從來盛事誰能久紅
窗碧瓦今何有煙雨題名自六朝今來惟剩春楊柳微茫重泛
渡頭船一片湖光接遠天池館已非金谷樹斷橋空鎖竹溪煙
當年花月無由覩此地傳聞盛歌舞第宅淒涼異昔時荒碑何
處尋芳杜茗雪清風紀麥秋使君高會盡風流懸知謝眺裁詩
處應憶南湖舊日樓

喬寅

閨思

纔見梨花開已見梨花謝獨坐理箜篌幽抱誰能寫雙雙蝴蝶
西園飛春色滿樓人不歸

冒丹書

六憶歌

選二

陽春三月東風起灼灼桃花映穠李屈曲長堤亂早霞行人錯
認桃源裏今年花似去年紅去年人醉桃花中自謂年年顏色
好碧桃花底還相逢忽狀春水三五尺春花飄泊嬌無力桃葉
桃根絕可憐萬樹春花空艷色人生盛衰各有時莫惜花前進
酒卮昔日繁華更何處遮莫桃花知不知憶盡堤來
岸桃花
懸雷山前古雲碧懸雷山後高百尺前連疊嶂干青天後削懸
崖崩大石截流半壁勢莫撐捫壑交藤路不識登臨半醉睨巔
岫尚憶孤亭俯青壁憶懸雷山
後峭壁

對月

城上擊柝烏夜啼天街寂寂行人稀行人絕少獨怊悵夜靜何
事風淒淒舉頭望月白如練低頭無語淚輕泫我有心情月不
知月明正在三更時

黃周星

垂虹新漲歌

亦不必觀錢塘潮亦不必觀廣陵濤但看垂虹五月漲吳江之
水勢何高我來吳江凡幾度時見微波落楓樹前年始見登長
橋垂虹亭子聊縱步是時正值大滂餘水痕刻畫浸橋柱閭殫
爲河蛟龍遊民其魚乎公無渡今年聞說鳩傷功重復故道溶
吳淞長橋測畔盡開闢一碧萬頃青天空蝦蟇蜿蜒互千尺垂
虹此日真垂虹我聞此語心踴躍恨不飛棹江城尙何期文酒
有詩綠楊來正逢六月朔高堂講會筵羣賢星羅霧合霏雲烟
如茶如墨復如火困車龍馬紛駢闐解衣盤礴競舐筆慘澹經
管寂不喧是時羲輪正卓午滿座荷香風栩栩忽然頭上黑雲
橫狂風颯颯驅瘴雨祝融繞收火龍鞭列缺更佐豐隆鼓詞人

拍手酒人歌金鉞鉞百靈舞我時魁跣坐高堂同心之友勸
傾觴龜茲却奏飛龍鳳絲竹嘈囂夜未央初期讌罷徐觀漲誰
知雷雨復震蕩高堂幾欲化長橋庭階三尺飛鯨浪詰朝徒侶
遽言歸回首垂虹空悵快我嘗作客徧九州洞庭彭蠡幾回遊
比年朝暮泛笠澤莫釐縹緲兩鳧鷗九天雲垂海水立談笑如
乘竹葉舟况復松陵家咫尺乘興何妨便遨遊直須枚叔觀濤
日重看吳江八月秋

彭桂

中秋閣再彭邀泛淮河作

同令子
百詩

淮水銜城城銜月烟銷霧歇清光發一輪湧出碧天高蒼茫星
斗須臾沒此時秋色正平分此夜笙歌處處聞幾人親見霓裳
舞幾人獨弔洞庭君我尋八月雷塘暮正愁潮聲廣陵路直來

前看海門雲便將北過黃河渡黃河南岸泊淮揚停舟先問眷
西堂堂中主人邀讌客歡然日暮飛霞觴醉後飛觴客不散更
喚遊船張酒幔明河脈脈指銀灣畫檣啞啞穿柳岸柳隄曲岸
繞城河城裏喧聲城外多雲端未墜涼州曲江上誰聞子夜歌
主人命客客安坐吳琴在右箏在左初聞搗鼓向前頭只疑秋
雨滿船墮鼓聲徐歇樂聲齊細管繁絃自不迷腕中何徐手何
疾急能使緩高能低移船撥棹波深處銷燈最愛中流曙其時
明月懸當空樹影波光拏不住頻吹一曲紫雲回大忽雷間小
忽雷尚有清歌聲未起畱教夜靜始徘徊徘徊露下船舷濕四
面涼風來習習惟聞兩岸鏡吹聲隔斷烟波不得入肉能勝竹
竹勝絲幾番停拍換新詞中間歌樂一齊止主賓滿坐清言辭
當年諷訊泛牛渚風流袁謝應如許只今釃酒向淮孺有誰橫

樂臨江許僕本吳人能吳謠爲君倚歌吹洞簫莫望烏飛悲魏
武且翻水調命袁絢袁絢昔日歌聲起澄江白練明千里遠從
京口望武昌關山無數蒼蒼裏自泝流光擊楫愁頻弔魚龍落
木秋踏燈連歲青溪渡載酒前年赤壁舟青溪赤壁皆江上十
年吳楚悲秋況感君爲我奏琵琶不遣青衫淚相向酒教重熱
鼓重過但應盡醉莫思家迴颿不覺揚槳急驚起城頭滿樹鴉
拍拍鴉聲飛不定征鴻宿鷺遙相應主人送客客上隄滿地清
輝夜不暝可憐今夜月初圓三五向人淮水船不知明歲今宵
月又照遊人何處邊遊人散盡笙歌遠勝遊不減南湖晚安得
寫作翫月圖好倩君家閣立本

歌贈梁溪顧當如

君家梁溪我瀨水月色柴門去百里迢迢河漢不相聞乃今相

識長安市噫吁嘻彭生里門故豎儒顧生頎哲胡爲乎胸中豈
無書萬卷尊前各有酒一壺昔君甲第冠吳下汗拭朱衣赭白
馬萬金客散家雖窮一劍身存淚不灑我亦鬱鬱難久居仰天
長嘯辭田廬出門不與妻子別獨遊豈畏魑魅俱君歷三齊我
三楚空問東封弔南浦有時幾作若敖魂無故幾爲盜跖脯丈
夫七尺豈徒生不五鼎食五鼎烹誰能突梯與繞指脅肩僂背
從公卿布衣徒步走闕下塵埃黯澹南金價與君醉來擊筑歌
與君悲來杖地罵噫吁嘻如君如我勿悲辛眼光似電胷無人
且自飯牛衣短布終當釣鼈牽長緡陸機洛下竟無識始信司
空不易得入關未敢十上書抱策徒聞三歎息昔君投筆何爲
來豈僅翩翩記室才焚琴煮鶴誰知惜相從痛哭昭王臺昭王
臺空荒草廢無人因鬼得見帝顧生顧生爾胡爲斗室日掃毛

錐做噫吁嘻寒風易水長颼颼方將去子獨西遊君家住近要
離塚吳中俠士猶可求無爲去天尺五不見日長安仰視浮雲
愁

遊艮岳故址

明周王故宮
今改作貢院

大梁河決三十載紫陌朱門看盡改遊人指點故王宮荒丘艮
岳依稀在憶昔山河屬趙家上都風景最紛華八葉君臣皆浪
子爭崇土木鬪驕奢離宮離苑窮遊翫洞壑林巒聳天半自輦
東吳花石綱竭帑疲民馴致亂珍禽異卉其間那惜閭閻物
力艱一朝五國城中夢不到東京萬歲山須臾禁地共樵牧往
事傷心狐夜哭前代分圭更剪桐重築兔園葺山麓誰教寇盜
日紛紛仍舊黃沙蔓野雲只今龍種歸何處棘院空畱鎖夕曛
我來守卒爲開鑰翠壁蒼厓陰漠漠奇石剩有兩三峰御書尚

識宣和鑿登臨把酒淚如絲歷數興亡似奕碁零落白頭宮監
盡無人能唱憲王詞

章義民

壬辰竹醉日感寄陳元水

一身冒險經千里重繭還鄉唯欠歿兩家眷屬竝成塵止剩煢
煢吾與汝望斷飛鴻五度秋徒得寒溫書二紙孤筇扶病走黃
岡腸斷無言見君女欲問年來喪亂事不堪見子重悲母通家
嫂叔廿餘春一別那知成千古君雖成室未能歸我幸生還家
無所一飯頻年累及人中心戚戚向誰語君翁墓與我翁鄰春
風一過一傷神只愁光景長如此他日誰爲祭掃人

追悼謝伯美兄弟

若論文章與德行君應不受老來窮雖然天道原幽遠何事君

家無變通遊楚徒勞不得意遊閩徒苦又成空謝家寶樹名雖
重虛有清音不奈風弟喪兄亾三載內兒傷女老竟何從可憐
垂白有老親哀子哀孫淚盡紅縱有殘書無賣處縱有磽田歲
不豐干戈積歲疑難活雖在還愁食不充幾欲相尋到神浦拜
君老母哭君墓孤筇無力可奈何臨風三歎淚如注

金德嘉

長安道

桃李芳菲朱戶開離歌一曲酒一杯美人顧我揮長袖皓月邀
君醉幾迴君不見紛紛車馬長安道送盡紅顏到衰老

姑蘇臺歌送盧大

姑蘇臺下姑蘇土築作層臺貯歌舞館娃宮帶響屨廊鶴市雞
陂竝水滸繁絃急管逐年華俯瞰碧池名浣花望處烟霞三百
里築時膏血幾千家君王含笑憑仙仗玉几金牀九天上琥珀
光浮玳瑁筵鬱金香蕪流蘇帳卷簾臺下芙蓉開錦帆涇裏櫂
歌迴觀魚震澤紅裳至采橘洞庭朱實來從登夜半呼萬歲盤
龍墜馬人隊隊城上烏棲星漢高傳進黃柑催玉鱸千齡樂事
殊未央一朝枹鼓動橫塘甬東門外風蕭瑟水犀軍壘月蒼涼
從古衰榮如朝暮遊人試問荒臺路只今胥山松檟亦寒烟惟
有縹緲之峰高插天

田婦歎

長夜金風鳴促織兩日織成縑一疋門外喧呼吏索錢蓬頭老
嫗抱兒泣黃牯賣盡犢已無只有健婦把犁鋤縣帖昨來趣更
嫁了却新稅兼宿逋縣門土功晨擊鼓差徭簇簇來如雨老身
行鬻知何許

山農詞

茅堂四壁不蔽雨蠶箔蜂房走白鼠新婦銅釵換米炊縣隸苦
嗔飯熟遲往年人客留我屋人有盤餐馬有粟今年客至坐雞
栖不聞雞哺聞兒啼阿翁有家不得住身帶桁楊縣西去
古樹森森覆畝瓦居人走匿懸崖下荒田無犢不得耕舍南舍
北山鬼驚賣兒輸足今年稅預徵明年縣帖至

竹烟亭醉歌

寒風十月凋白楊蘆葦蕭蕭天雨霜草亭之竹何蒼蒼有客有
客夜傍徨傍徨良久鸚鵡舞雙眸炯炯空千古紛紛諸儒何須
數獨呼小兒楊德祖尊中有酒盤有餐倚劔還歌行路難美人
迢遞青雲端何以贈之雙琅玕

程封

大水歌

盤龍江千來大鳥赤目長頸名禿鶯土人驚訝惡物至尺餘大
喙類鴉鵲都言此鳥非見慣飛入城中招水患發書占之應不
祥處堂燕雀全無辨鵬似鴟鴞世所哀號號常轟白晝雷經笥
食案堆螻蟻穴居知雨真奇哉六月二十有六日愁雲壓城黑
如漆海上俄傳白鷺多井中乍見青蛙出須臾大雨竟滂沱夜
半翻成瓠子河丹腹朱薨仍樂國歌童舞女尚南柯怪殺陽侯
怒不止頃刻頓成一丈水張燈列炬亂奔逃打戶槌門盡披靡
無何白浪照東方扶桑匿影天無光街上高樓剩屋脊門前平
地變河湟觀者誰云水懦弱瀾瀾滔滔無測度避難因思王粲
樓拔書何處揚雄閣可憐萬戶走鯨鯢命孃叫號兒女啼乘船
入市難尋岸架木爲巢莫構梯城中長官愁漉漫藩王城上動

三歎兵器沉埋未可觀
室廬漂泊真無算
吁嗟乎螺螄灣上洞
庭寬寶象河邊水
接天我欲浮槎問
河伯皇天后土何時
訖君不見咸陽宮闕
連天起複道重門
耀金紫又不見鐵甲
雕戈炫日明十萬
雄師細柳營當今天
子稱睿知萬國珍奇
爭獻瑞莫笑憂天是
杞人小心昭事求天
意

呂士鶴

甲馬營

疲馬嘶晚風驚鵬側
雲翥共指當年甲馬
營宋家天子初生處
南北東西天地昏
中原豺虎正雲屯
道人一睡三千日
大笑睡驢見曉噉

且讀齋對月有懷黃山寄大兄

階前抱膝楓葉撼
繁星自照天涯客
清耳哀蛩不斷鳴
一簾寒影疎燈隔
此時故園秋色多
千山錦樹當如何
黃海無波亂雲淨
老松怪立高嵯峨
吾兄暇豫應長往
谷口宵猿發清響
白龍潭上雨初晴
紫石峰頭月尤朗
起行烟樹滿空庭
仰視明河夜氣青
總然痛飲難消盡
夢在山前第一亭

雪鴻閣眺雪

羣鳥噪田棲復起
寒威到面如挾水
凍雲漠漠簷際垂
敗葉時來打窗紙
此時把酒慘不樂
雞犬無人野蕭索
鄰家訴饑啼向空
空空裏雪飛滿高閣

王 攄

雪灘釣叟歌爲顧茂倫賦

吳綾作畫不盈尺
上有一江秋水碧
兩笠烟簑坐釣翁
泊舟相近天隨宅
平地渺渺鷺飛白
柳岸烏犍背吹笛
橋外山光山下

湖撥刺波跳魚尾赤釣者爲誰茂倫是作詩年來瘦欲歿君家
樵水畫作殊微得當時虎頭意一詩一畫二妙并別有天地漁
樵裏君不見黃鵠磯頭戰鼓悲又不見金牛道上征塵起英雄
鬪爭未有已江山輸與漁翁耳朝歌
富春豪傑往往隱于此焉知釣者非其人雪灘之圖此意否煙
波風月俱詩酒但願投竿得巨鱗放懷身世夫何有武陵漁舟
傳至今曲曲引入桃源溪雪灘亦似武陵路中有仙源無處尋

沈聖昭

天馬行

江關積雪何紛紛羽林萬騎來如雲忽徵六郡良家子盡向天
南送馬羣圍人萬騎儼成行里胥廝養牙爪張酷椎千名競相
索催夫夜半鳴銀鐺馬肥稔稻飽欲歿人乏糟糠饑不止腰鎌
赤脚履層冰十指半墮黃沙裏天馬由來多嚙蹶蹠踏屍骸照
夜月千尺寒江凍不流紅者血肉白者骨丈夫軀命絕可憐生
當亂世歿道邊一朝被驅別妻子魂魄不得少流連吁嗟七閩
復轉戰輓輸日夜催鄉縣烽火燒天三浙紅軍聲萬里傳銀箭
常年飽飯稱苟安閉戶吞聲淚如綫君不見堂上之雀幕上燕
生歿那得常相見

于懋榮

長歌贈爻

北風一夜生吹斷原頭草我歸患不遲子去愁不早倚伏由來
安可期不見淮陰市上兒當其未遇隆準日乞食王孫誰得知
自古豪傑皆如此常時往往困泥滓東方索光長安街長卿滌
器臨邛市慷慨起聽行路難人生去住總無歡羣狐豈復畏一

虎凡鳥翻欲欺孤鸞滿山零落徧飛藿浮雲慘澹日色薄天涯
同作蹭蹬人邂逅相逢殊不惡既傾灘鷺卮復倒鷓鴣杓寂莫
心所求惆悵身所託飲罷爲唱紇干歌飛雀啾啾避網羅新巢
未織無處所舊巢墮地欲如何

同夏珠弘室遊西山是日立春

狐裘蒙茸不禦風柘木之屐陷泥中前隨潘岳後沈約崎嶇早
趁落日紅古道水堅錐不入野禽無食飛鳴急欲上不上行步
艱仰望西山勢岌岌今年舉室愁懸磬男啼女號那堪聽令節
空成寂莫過千門猶貼空春勝泠泠石瀨瀉清湍澹澹曙光生
暮寒去住俱是不得意徒勞故人勸加餐

戊午元日作

去年元日掩禪室雪飛滿天大如席今年元日纔到家牆東寒
梅已著花春禽已曙啼聲巧陌上繁華矜獨早羞隨羣屐諸少
年陽昌壚頭但醉眠

期蔣大鴻不至作

青槐映碧水蟬聲夾岸聞江南江北風吹徧榴花落盡未逢君
昔遇吳城春色早一朝綠盡原頭草野館棠梨舞蝶輕津亭楊
柳啼鳥少憶別經時意惘然雲中尺素近方傳布颿何日行人
至共向黃公壚上眠

賦得林屋洞別丁筠雪并署中諸子

東望洞庭夾兩山面面湖水相迴環參差名峰七十二月出照
耀如雲鬢山下有谷何窈曲此是洞天號林屋漠漠冰崖長綠
芝陰陰石几飛白幅龍威丈人昔所居中藏大文不易讀麟角
拄杖出海東青天萬丈躡彩虹蝶翅如輪銜不盡無數落花洞

口紅左招浮丘右子晉飛揚跋扈自稱雄我歸欲覓閻河實倘
得輕身一再逢

黃之翰

金魚池歌爲洪太常畏軒賦

燕臺八月秋風爽仙人玉露零金掌秋露秋風戀客遊名園到
處耽吟賞名園最勝屬誰家太常別業真堪誇粉壁長廊深薛
荔山房石室含烟霞太常高臥烟霞裏招我同臨水中沚金魚
池畔敞華筵萬點朱鱗泛秋水水滿池塘葺藻陳凌波吹浪意
何如網罟不驚天地闊樂哉何異濠梁居須臾細雨中落紅
尾青鬢恣遊躍翻疑淡處藏蛟龍猶恐乘風忽飛却噫吁嘻丈
夫失意空沉淪安能掉尾乞餌逃芳津請君試看池中物風雷
終奮滄洲濱

姚夢熊

閨怨

妾住在江南君行向江北南北遙相望日夜長相憶東鄰夫婦
如鴛鴦奈何妾獨守空房空房不可守掩淚當窗牖憔悴老朱
顏誰惜飛蓬首無端草砌嬌黃蝶粉翅香鬢隔花葉好花零落
胭脂寒何用雙雙飛傍妾

岳鰲圖

行路難

登山莫登鐵嶺巔黑林陰森白日寒涉水莫涉九龍灘舟行水
底凌層湍青泥曲折虬龍蟠山魑颯颯摩人肩子規叫月愁空
煙澗流萬壑聲潺湲噴石驚濤浪拍天雪風亂卷青琅玕高懸
千丈落雲端吁嗟乎行人生長鶯花地安知風波如此之艱難

楊无咎

赤壁

武昌城下滔滔水東來日夜無窮已中流赤壁何崔嵬千古猶
然獨高峙當年吳魏此交兵水底魚龍不敢行千羣舟楫臨江
許萬頃波濤擁旌旌當塗意氣何太奇橫槊高秋夜賦詩自言
四海歸心久竊比周文竟不疑本謂吞吳反掌間誰知勝負本
無端雀臺未得登嬌女鸚鵡翻教遜阿瞞阿瞞遜入華容道百
萬雄兵跡如掃鼎足三分自此成江東半壁從茲係此事經今
千百年我來憑眺心茫然昔時王氣杳何在惟見長江水接天
叔孫所稱三不朽功業文章竟何有周郎偉績等寒灰孟德雄
才同敝帚獨有羊公德足欽當時遺愛入人深峴山亦在武昌
北每度看碑淚滿襟

何嘉延

江氏雙節婦

青春白晝泣黃鵠日日身啼寡婦屋叔也玉樓召猶子雙鬢髮
居脫羅綺不向山頭望藁砧懷中文葆呱呱音雛鵲么鳳固云
可螺贏呼來亦肖我風雨書檠伴紡燈兒名霄漢妾操冰一朝
輜軒採彤管禮宗懿範首編纂三讓不肯獨受旌義聲卓越莫
與京女中丈夫真皎皎吾見鬚眉如此少

黃朝美

登雨花臺秋望

時甲申避亂南渡

龍蟠虎踞帝王都三國六朝爭雄圖我上高岡望城闕後聳宮
殿前浮屠浮屠之高幾百丈上與浮雲同混濛報恩寺接雨花
山風景晴陰非一狀秋冬之際難爲懷舊日新亭安在哉江東

髮吾不可見謝相圍棋那復來今人卽踐古人地古人不與今
人異安危全是仗人才世運如何有與墜長江浩浩淮湯湯鍾
山紫氣迎朝陽木末亭邊木葉脫青松紅葉滿山岡又值車書
覩王會貂蟬許史共金張指日太平如有象不應門戶爭鈞黨
誰云南渡尚浮華江左規模繫遐想

醉後歌示諸同人

淫雨不斷過長夏江鄉誰是開眉者平陸成江阻往來此際涼
風初駐馬不分仕隱共冰心自是同人同于野鳩婦纔呼桑樹
巔蛩音細答桐隱下兒童不敢指虹霓笑對殘春落屋瓦分明
嵇阮竹林遊何羨廬山白蓮社回憶昏墊混魚鼈數月襟期失
瀟灑入夜明星爛几筵莫負剪燈重洗筆

黃對

秋郊行

風急木葉脫曠野天寥寥日落行人少倚杖心動搖八月秋中
天氣肅舊宮零落吹黃菊荒草原頭聲慘悽野老驅牛向寒谷
寒谷經年水亂流野老終日聽寒湫城市衣冠未到眼熒熒無
告容顏愁白楊路傍結營屋攻城鍊騎翻山麓聞說前軍夜合
圍風冷沙場新鬼哭城中戰定樂太平城外白骨尚縱橫西風
颯颯不得寢山月愁生烏夜驚烏夜驚向空鳴不得寢難爲情
老人摧殘已逝覓野火時燒白晝昏田園只今非舊主十家九
家空閉門嗚呼古來時運迭盛衰北邙山下已纍纍及時徜徉
勿皺眉不然老大秋來徒自悲

蓮塘曲

城上日落風聲起城下陂塘長新水陂塘蓮葉綠翻天十里香

來千萬藥我來濯足立西岸魚跳白珠鷺鷥竄朱欄翠幙迴絕
塵膩粉含姿晚霞亂亂霞遠浦烟色迷水禽對對衝人啼採蓮
女兒望不見雙漿隨波歌漸低莫逞如花好顏色肩上海雲不
再黑花枝笑比好紅顏紅顏看花長太息君不見今歲花開顏
正好明年花發人將老把淚惜花花不知幾日西風白隄草

顏光敏

菊歎

東園甘菊高過牆主人與爾同風霜北窗支枕盡炎景婆娑已
似聞寒香六月芸黃雨轉急中宵獨往擎雙笠濺葉猶防錦石
崩漂根豈合汗流入秋冬之間懷抱惡年年值此同蔣藥盡賒
市酒羅戶庭大索明燈綴簾幕去年倍蓄不盡開今年委絕纏
蒿萊籬邊朝槿終何用偃蹇愁眠罷舉杯

寒食日過故沙丘

在宛城東故青樓也

君不見見綿上山孤高表雲海同時壽侶紛光彩黃河投壁今安
在又不見故沙丘朝朝寒食王孫遊田家八口憂餽粥汝曹博
塞皆天祿早知巢覆爭須臾恨不常然夜遊燭青陰左右連槐
衙明星漸落啼早鴉鑿蹄驕馬轉飛鞚迎門對埽棠梨花棠梨
歲久成高樹不蔭樓臺陰丘墓牛山有淚行復歌古來如此當
奈何

江南詞

江南春色遠遠見大江流江流無停意春色安可畱沙棠之舟
泛城郭舟上紛紛雜花落不見其人空渺然日暮芳洲舉杜若
醉時歌贈孔垣三先生

仲冬物色凋已久陷日埋山朔風吼屋上縱錚金鐵鳴城隅歷

亂蓬蒿走故人幸有金叵羅斗室紅爐照虛牖憑陵袒跣傳博
徒褰帷弄爵出纖手爛醉十旬君不嫌拔木九十我何有人生
自古趨炎熱浮雲相踰倏相滅君不見道旁溝水藏鯢鱗昨朝
日暖層冰裂淘河之頸肥如瓠飛來飛去須臾竭鴛鴦禿鷺無
覩顏忽來啜喋森成列拔劍捎網古來有胡爲比屋仳仳無才
傑我欲言之言且長潦倒負此燈燭光飄風乍息天嚮曙空階
皎月凌巖霜爲君解醒進一觴龜山斧柯不在手大澤封狐額
盡張晏居深念竟何益不如琴瑟車馬聊徜徉

麥雨歎

寧逢旱魃行莫見商羊舞小麥黃時賽田祖汗流肩頰何太苦
霏霏淫雨連三旬却恨炎曦在何所昨日飛蛾空麥頭今朝麥
尾生黃牛麥中小蟲名嘉賓幾日作糠粃長饑更待涼風秋勸農使

者來省耘麥花布野揚苾芬豈知倉庾有災青翻嗔野老多傳
聞頻年屢歉蒙寬假秋來併命鞭箠下蛾兮牛兮何爲者覩然
食我倉中粟何不往遮使君馬

兗州故宮篇

吳門一唱吳宮秋吳人悲憤吳王愁古來亾國盡淫放誰言天
道終悠悠東藩肇封始洪武恭儉直與河間儔我尋遺構入西
苑惟見陰洞藏鴉鵲池旁渴烏繡苔蘚橫橋已斷寒塘流桃花
墮地旋入水風牽亂上如浮漚昔聞嵒山響虜策俄傳汴國傾
陽侯河濟桑麻尚樂土紛紛趙舞兼齊謳先公親賢作干櫓已
知孱弱輸營丘何況桐圭擁虛器安危坐聽神京籌文皇大略
定中夏祇防同室操戈矛兵戎屢詰付竈養藩籬欲撤先虔劉
涖灘之歲那可道小醜終貽濠泗羞嫚辭竟抵會同館羽林翻

過日集卷八
作傳書郵白燈乍懸久駭散青螺出幸同羈囚空庭獨立見何
晚累朝袒免誰同讐刀俎遊魂互枕籍灑血不得漸螭頭魑魅
旋消紅日霽縱橫白骨無人收十載農人耕廢苑茫然不解漆
室憂金口壩前漫歌舞何如寒鳥聲啁啾

徒步行

五里一休堠旁樹十里一憩沙頭津僦驢滿道行不顧有錢自
醉梨花春朦騰乍覺風雨集高樹濃陰如戴笠眼看西山雷電
激陰厓鬼魅皆闌入大聲蹴地萬馬過溪頭濁浪高嗟峨巨石
旬隱類搏檝小石礮礮爭旋渦雙蛇綦綦大如韉忽下波濤走
精銳吐舌俄驚鼃鼃逃昂藏頗竊蛟龍勢噫嘻生不能爲東海
之鯨北海鯤忍能與爾同崩奔鳴雨旣過決獨返泥濘已沒輪
蹄痕夸父逐日走江漢支離鼓箎謀饕餮白駒過隙偶然耳人

生何必出國門

青柯坪

我經華陰來秋懷苦悽愴一登十八盤塔焉如盡喪手拂岫幌
開雲關峰巒變滅無停狀狸狂嘯雨猿晝啼咫尺但愁六歸向
蒼藤羃屨穿危棧高下冥迷那得辨渭水秦山纔放磧道石
稜幾千轉舉頭忽訝青天開垣屋鱗鱗綴晴巘長松挂壁森蓬
藿細霧綠屏裊煙篆吁嗟青柯坪壯觀真崔巍三峰高在天于
我何有哉安得巨靈咆哮重摩裂二十八潭傾帝臺手挽鐵船
入天漢仰扳十丈蓮花開迴頭却笑羨門子坐看東海生黃埃

戊申六月十七日齊魯地大震歌以紀之

冥海禺強立天門啄害下人乘夜昏耳間青蛇雙啜火蜿蜒競
與蛟螭奔穿窮地肺作陶復豁舒勢欲無崑崙太噬羶羊細螻

蝮蒼生履厚徒惛惛千雷萬霆伏牀下發聲直奪飛廉魂城郭
跳踔金石走六幕八柱手可捫威斧怒劃裂平壤幽光騰閃疑
陸渾黃泉激水立千丈虹霓交射相并吞踉蹌裸體走曠野摩
挲大樹同鷓鴣荒雞不鳴狗亂吠行衢南紀猶嗶嗶閭門漸返
尋骨肉眼明喜見扶桑暎恍疑中宵現妖夢一時慶弔忘饕殮
共言巨鰲覆公餽縮頸自請甘鉗髡高陵淡谷瞥然改岳瀆亦
失公侯尊嗟爾東人出兵燹版築未就三冬溫焚巫暴尅測天
意疲氓忍使瘡痍存西方雨雹大如象揆九篝火驚烽屯野人
習見尚云妄監門何得徹九閹三十年來增戶口祇愁庸調拋
兒孫邨頭一夕徧燐火舊鬼煩冤安足論

江閣

長江沒山根重雲覆山頂中開石壁炎天冷誰施鐵索懸飛樓
仄經螺旋到人境樓前倒影十丈杉風枝霧鬣搖巉巖石根日
落黑蛟湧行舟遙過驚收帆夜來高歌望雲海空山白鶴應相
待君不見江中舟浦須臾改漁人舉網東復西江籬落盡無人
采

斲冰行

河中夜雪寒太酷兩岸嚴風折喬木千人斲冰冰亂開鼉鼉下
徒鮫人哭荒雞聲斷聞鏡吹舳艫銜尾相逐蹙紅旗獵獵拂雪
乾朱雀蒼龍耀雙燭昔到炎荒供豆莖黃茅萬里雲煇煇弓撥
矢鉤鼓聲灰但願羲和滯南陸豈知天伐垂東南元蠶赤蟻猶
在目恨無膂力操戈鋌敢愛瘡痍飽鞭扑東方日出傳朝餐停
船翻受篙師辱熊躡牛臄凍不肥爭向南邨求雁鶩南邨婦子
輕室家歲拾橡栗采野穀朝來烏雀盈牆頭遲迴恐是逃叀屋

聽董樵談海市有述

董樵久居蛟蜃鄉飽看海市頭顱蒼北來碣石侈天口頓令座
客神洋洋蓬萊傑閣倚千仞空明四盡無遐荒霾曠久消乍蒙
昧天輪膠戾如簸揚大舸連檣蔽空下黃頭擊汰皆戎裝旌竿
林立間龍盾屹如烽櫓蟠城隍觀者欲走旋脫壞崩雲屑雨迴
清光島石劈裂斷盈丈就中窈窕開芝房天窗綺疏射朝霽階
前雙樹枇杷黃我語董生未爲怪人間萬事殊壽張塵埃野馬
團大塊誰鑿混沌災中央層城華屋劇泛梗旅獒白雉誇殊方
皮島大星隕如斗偏裨廝養翻侯王天吳見此應未省那從遠
睇窮毫芒神山跬步不可接安期一逝成荒唐雲車風馬有何
意徒與塵世逐秕糠從來海市依近島祇疑芥子浮坳堂安得
巨靈爲鑿盡滄波萬古空茫茫

九月十日子綸邀同人泛舟東河醉歌

我生隨地逢重陽放船獨數金陵快江心柁樓一丈高坐見洪
濤納千派赤波萬頃連扶桑突立江豚向天拜爛醉豈知津吏
迎狂呼每犯舟人戒自從都市飽塵鞅常憶秋空浮沆漉故人
持節來東河衙前綠水添澎湃鏃金伐鼓羅衆賓短詠長歌出
官解昨宵雨阻龍山飲曉雲散落如崩壞游魚潑刺跳相濺菊
花細鎖沿邨賣金臺已平馬骨朽當杯豈暇論興敗慶豐閭水
爭須曳煦沫旋渦轉幽怪人生富貴會有涯摧眉折腰天所械
嶺上松筠常自寒空中鵬鷃誰能鍛何時攜手三山巔下瞰神
州似織芥

崔干城

送趙完璧游泰興

五十餘日邗之濟青山青眼隔江語白雁飛飛黃蘆乾莎雞叫
月還振羽分付西風洗釣磯蒼雷紫電驅秋雨歌鐘安得聒漁
竿子歸來兮自上處方外嵩山容易逢海滙伊誰逢唐舉

璞安國成留飲興教寺銀杏樹下歌

紅燈久不照千古努目金剛聽怪語銀杏謾謾來天風細和笙
簧鉅雷鼓大盞小杯如翻盆禮俗雜坐更留髡生小揆奇愛劍
仙思凌九點九州煙每到驚風掣紫電繞身才有一白練都市
長歌洗人血頭落不見殺人面高談廣座齒嚼鐵關弓常射冰
天月男兒七十難行意不如閉戶燒榾柮計然五策濟越難鷓
夷子皮聚能散千兩黃金擲與人斗筭餘子何足算近傳至人
不灰方余三島鞭石羊大抵神仙培養如果仁于今兼味種
生薑吾師復教耐糟丘遮莫也過岳陽樓王方平葉法善夙昔
共醉蕊珠殿任取月轉天潢流下方瑟瑟傳銀箭

黃時

春夜獨酌

歸鴉栖栖噪樹間日斜雲影生暮寒閉戶無客成兀坐燒燈讀
史增長歎荆卿氣概不畏死擊筑高歌寒易水更有力士秦舞
陽十三殺人如敝屣豈知匍匐秦庭下顏色振栗真豎子嗟乎
丈夫既以身許人安危利害等浮雲畏死雖與捐生異一時成
敗何曾分且自銜杯對明月階下老梅香正發此身直似太虛
空纔看東行復西沒悠悠我心向誰言且笑且歌守故園仰見
繁霜透林際征鴻寂寂去空軒自憐鄙吝孰爲伍每當高會偏
多阻如此良宵勿浪過回思昨夜猶風雨

鄒震謙

少年行

花滿長安二月中五陵公子醉春風貂裘寶帶青驄馬千金結
客何豪雄相逢一諾成知己座上賓朋盡珠履紛紛挾彈懸琯
弓朝來射獵新豐市綠楊古道娼家樓當爐紅袖笑相畱左按
銀笙右玉管歌聲嘹亮雲悠悠酒酣日落停杯起轉眼繁華似
流水便教行樂日如此不滿三萬六千矣

靈巖懷古

秋光滿野煙籠寺我來覽古悲陳事吳山越水兩茫茫俯仰滄
桑無限思記得夫差霸業雄館娃臺閣凌蒼穹歌扇三千迷夜
月舞衣二八驕春風就中艷冶誰傾國苧蘿女子好顏色笑捧
金卮倚綺筵朝歌暮舞歡何極舞罷歌殘樂事徂會稽甲士入
姑蘇不道蛾眉翻助越那知烏喙竟亾吳回首繁華纔廿載一

朝麋鹿遊宮內響屨廊空香徑寒珠簾玉砌今安在遺址依稀
瓦礫中夕陽一片泣孤鴻山僧未識興亾恨還對遊人說故宮

方廷侯

江氏雙節婦

節婦姓程爲護誠先生元配
姓汪卽先生令姪鏡若妻

錦絃曼碎雌鳳泣釵頭玉燕飛相失衰燈絡緯掩寒閨月照流
黃孤影立此堂陶母金釧空更有其姜抱志同海枯石爛有時
改冰雪爲心氣爲虹

吳度

江氏雙節婦

庭前雙柏枝松膠濟陽有母今白頭姪婦相從賦柏舟機杼對
鳴春復秋寒燈照壁不知愁有子成立心何求鸚鵡五色鳴啾
啾羽翮養就摩霄遊陵茗芬華有時改雙柏青青終古在

丁 煒

征婦怨

邊風颯颯秋蕭索鄰砧夜擣霜月白空閨夢斷戍烟深重理殘
燈動刀尺憶從南國羽書飛嚴冬雨雪正霏霏將軍受詔辭金
殿戰士長征臥鐵衣孤城百仞重圍合間道短兵日相接終年
苦戰陣雲黃丹楓空墮離人血妾來猶未拜姑嫜熒熒獨守只
空房男兒能倘公家急生女真堪棄路旁昨夜春風入苑李纔
見花開旋結子知君不逐南歸鴻妾心自誓東流水

次和田子綸移居

水曹移居聞借車湫隘頗類曲逆家欄下菊荒巢蝙蝠門前葉
落驚麀麀身閒屢給大官籍洛誦朗朗蜂排衙長鬚遠糴太倉
米歸遲屋角日西斜先生擁鼻但隱几魚陽初沸蒙頂花興來

爛熳詩百首聯翩有似脚尾鴉篇終騰沓只自賞擊節潛應迴
颿槳愛君佳句逼錢起中夜鼓瑟聞靈媧

月下獨酌

小園草樹交成蔭秋日當空如水浸一杯獨酌誰勸酌月色花
香相對飲悠然萬籟發笙竽先生放歌觀無悶月中營魄幾時
生織河御輪但一瞬圓者爲誰缺者誰但照人間雙白鬢吁嗟
萬物如土直天地紅爐一灰燼盜跖縱橫鮑焦枯彭夭殤壽詎
能信忽施雨露忽雷霆徒握化權弄頑鈍安得羲農長不改覆
載無私同任運睢睢盱盱今古齊不識不知帝則順不然燭龍
腐爛六鰲死元氣茫茫常混沌何須老氏五千言未用莊生齊
物論我欲痛哭呼蒼旻悲風蕭瑟月生暈酒罷歌殘夜色深倚
牀剪燭續天問

柘浦山行時烽煙初靖夜宿漁梁淒遲達旦歌以紀之
古道荆榛斷人跡千峰倒影日將夕數家荒店半橫斜僅存四
壁無安宅入門蟪蛄網簷楹立久主人始出迎皤皤鬚髮白勝
雪扶杖但聞歎息聲借問寇氛今靖否低徊不語但搔首入夜
空村虎豹嗥瑟瑟寒風吹戶牖驚心飢鼠鬪人前聒耳寒蟲隨
我後飛磷明滅盈丘墟幾點疎星掛碧虛不寐偏愁更漏永聽
僮數問夜何如

陳菁

愁歌思歸行

是歲有閏

人生百歲能幾何歡時况少愁時多光陰一瞬逝不返那堪日
月成蹉跎計日三百八十四今年忽忽消磨去一半風塵潦倒
間一半感慨悲歌處曾記經春燕市還夏秋郎水又中山昭亭
落盡三冬葉南北西東總未閒而今落拓走春穀曰惟改歲猶
征逐錦囊羞澁歸計疎暗裏幽憂愧僮僕家有老親日倚門吾
弟當亦懷其昆室中兒女喁喁語魚書久曠心曲煩吁嗟一年
三百八十有四日在家不及三之一余豈萍漂逐浪遊余豈蕩
子忘家室君不見楊柳條空雨雪霏何處征人不憶歸又不見
南來賓鴻雁遠到衡陽還北飛

沈虬

削鵲行

時當早春北風疾舟從梅堰灘中出忽見蒼鷹村上飛村裏雞
雛爭相失蒼鷹攫雞飛空中羣雞叫號母雞從老婦兒童盡驚
起竹竿瓦礫無停蹤鷹視多人殊不畏盤旋側翅行陰鷲俄有
削鵲自東來噉喙九天恣吞噬蒼鷹見之心膽摧雞雛被奪徒

徘徊早知攫食飼他人且養機謀
草萊鶻也矯捷勢莫高下
視蒼鷹如兒曹那知挾彈少年眼更瞥弩機發處羽毛裂

姜垓

贈姊丈王文學

盜賊之間昔狂走身負姪妹隨老母揮汗狼狽宿西莊煮羹然
火吾甥舅至今相別六七年披髮垢面成老醜王郎王郎舊坦
腹儒冠布袍人不俗大者高左皆不下小者驄馬貴公屬非必
孑立尚激昂要使傲氣自無辱嗟余同氣居不寧王郎疲驢來
五更執手對君如夢寐未忍開口先吞聲故國丘墟感疾藜城
路蕭蕭無人行前年人歿穀莫食今年牛疫人代耕官吏催租
號令急丁夫馬豆俱有名早聞斯語神塞默江南山東計何得
餬口既乏祖父遺無錢安能自樹立我欲報母報誠

難連牀蹴坐悲相看

繆振光

夏日園居

選三

梅根守熟酸流齒石罅敲殘火出髓且幸荒田麥有秋不妨長
夏炊無米優游別墅書屋涼改竄舊文筆花泚一畝池塘半芟
荷風來不禁波瀾起

夜常不眠晝多臥詖蕩天門白日挫沉淪虞夏枕中長乾淨乾
坤斗來大谿莎窈窕三畝宅臺石安排八角磨獨笑獨歌誰寤
言綠陰淡處黃鸝坐

新晴我獨入林曉那更陰森助憂悄鄰翁未及補短籬山鬼如
聞泣澗篠水邊白石踞何高葉裏青天來最小鳴蟬底事日煩
聒欲下不下空林鳥

邵長蘅

京口行

前月有人京口至向我具說京口事可憐十萬良家子被驅血
作長江水馬首紛紛紅袖啼城中處處青燐起玉帛子女委如
山良民痛哭官兵喜憶昨海艘蔽江下餘艘艤艫捷如矢炮火
朝轟建業城烽烟夜照瓜洲市北軍病熱人馬疲遼人三萬一
萬歿豈無浙軍但袖手將軍陣亾中丞走天塹之險安在哉區
區孤城亦何有城中食盡還出降官吏抱印趨道旁釜魚假息
非得已男號女哭形蒼黃從來兵機有翻覆龍江關頭夜飛鏃
飲飛材官騎若雲歿國還能立戰勛嬰城既有郎尚書殺敵復
用梁將軍將軍突騎來酣戰虎頭燕領誰不見腰間血洗大食
刀馬上橫飛僕姑箭追奔逐北旋枯蓬沿江報捷速飛電此時
官軍却入城苦歿雞犬無留生詎有童男貫高槩似聞節婦懸
衣桁嗚呼此事重可吁誅戮豈異犬與豬上功盡擬侯王相烈
燄翻將玉石俱殺民何銳殺賊怯爾輩不得誇身殊昨聞寡嫗
哭交衢骨肉喪盡身羈孤腹饑足蹇但僵臥日暮哀哀眼血枯

走筆贈別汪九兄

與君相識六年前與君相知六年後看君磊落無機心一生好
仙兼好酒金丹三百註不遺青囊一卷繫左肘憐君踈踈困羈
旅畱君吾家兩年住吾家樸率野人風經旬蔬食寡鮮豕小摘
園葵菹莖酸軟炊香粳煨芋紫腐儒粗糲君不嫌瓦盆沽酒勸
君醉醉時酣睡醒時笑忘形往往呼汝爾歲時伏臘具主賓跪
拜禮數如弟兄小兒年纔五六歲相見拱揖呼先生舊年五月
君別我囊空羞澀艱旅食今年五月君重來芙蓉初紅酒筒碧
但恨野夫倦荷鋤清談不得窮晨夕溪頭斜日重送君期君十

月還來覲此時主人亦得閒牀有清醕盤有栗爲君喚婦炊新
春醉飽無事睡亦得

隋宮篇

隋家宮闕臨江汜宛轉垂楊拂江水絲管晴風十萬家流黃落
月千門裏千門萬戶碧瞳瞳魚鑰沉沉鎖別宮複道交窗金屈
戌珠簾繡柱玉銜龍牙籌夕飲銅盤膩錦幕春開粉頰紅翠蛾
紅粉嬌非一恃寵揚眉侍君側宮女初司迎輦花宣華先賜同
心結妝成綃帳繡鴛鴦邀得春風迷蛺蝶鴛鴦蛺蝶自雙飛鈿
合金釵願不違秋夜蘭熏沉水味春朝舞換縷金衣比翼交枝
君不見別有菱花照人面只言歌舞長千年誰信須臾滄海變
瓊觀迷樓安在哉玉輦金輿去不回煬帝翠華還寂莫美人白
骨自塵埃君不見吳王姑蘇高插天十年麋鹿生荒烟又不見

銅雀嗟峨漳水濱西陵松柏推爲薪英雄割據徒爲爾富貴豪
華只如此淒涼往代不勝悲詞客登臨雙淚垂潮來潮落空閨
側隄外長江似舊時

張羽皇

題狂瀾砥柱圖

并序

吾里崑柱王公先大父同年爰也秉憲湖西鼎革之際以不屈處長君且華嶠嶠十九年扶柩歸葬忠孝大節萃於一門茲遊宛陵梅子耦長作圖狀之予嘉其意又附短歌

彭蠡湖水連天白獵獵朔風吹不歇驚濤駭浪相喧呶一夜魚
龍徙窟宅魚龍徙兮據天吳桑田滄海成須臾江河日下誰撐
扶上有大孤下小孤大孤屹立橫湖口砥柱狂瀾歲月久父子
大節豈徒然應與此山同不朽

輓姜如農先生

并序

萊陽姜公崇禎朝給諫也以劾首輔得罪戍宣州值國變久寓吳下癸丑疾革語其子曰瘞我敬亭之麓誌君命也二子如其言羽皇作詩輓之

先朝給諫姜夫子伏闕上書上不喜鼎湖龍去三十年沒身不肯歸故里當時宰相負明君白首忠臣遷謫歿孤墳淺土敬亭間碧血千年照青史

秋夜嘆

筋骨秋來病欲折猛風終夜冷于鐵暖老何曾有燕玉布被多年紛破裂伏枕雙痕憶少年健如鷹隼摩秋天安得身手如昔日往來射獵城東田草間狐兔不敢前

邵懷棠

孟春二十五日偕王慶仲出遊城南徘徊郊壇之下因過姜尚甫暢飲共爲長句以記其勝

春郊雪盡漫平沙沙上鳴鞭日未斜城南芳樹知多少馬上看春覺春早共憐春事到垂楊宛轉芳林興未央相看意氣傾盃酒知我與君堪作友天涯兄弟倍相親何況相逢是故人燕山甲第崔嵬起五侯七貴何濟濟寸心落落知誰向斗酒論心見知己知己從來不易逢江南塞北竟誰雄南皮高韵空千古都付銜盃一笑中

姜梗

對雪吟

去歲京師雪三尺畫簾人醉江樓笛今歲江南三日雪竹燈孤館青烟結人生幾何東復西五更衾冷聽雞啼

大雪詞

城中斗米錢一百雞豚塞巷木棉白徵租下令雷霆急老父賣

兒街土立老嫗關門掩面哭冬青樹倒壓破屋

贈江上老人潘止菴

柴門不正短籬斜夜來微雨開桃花東風卷簾老人笑舊年芍
藥添紅芽江鷗過庭水鳥鳴竹爐茗椀香正清
江部邨南十畝田佃丁逃竄無租錢新穀秋來無一粒縣中長
吏催科急野菜作羹豆作粥諸兒書聲出破屋

陶汝鼎

擬赭樹報秦皇歌

君山寺前銀杏大十數圍傳是秦皇赭山所留中裂
若巖而枝葉特盛歲結實可數石其真能睥睨祖龍
者矣作
報秦歌

天荒地老六王卑八百湖光變風日扶疎小樹暗湘山帝子祠
前雲似漆龍舟不進聲滿空千樹萬樹光熊熊山桂憂傷木蘭

泣須臾萬頃湖波紅微軀半作光明燭以身欲蔽千寒玉天吳
大嘯湘靈啼捲起銀河灌秋綠鴨脚翻風自少年蒼蒼一半生
雲烟崑崙西望穆天子海上東思魯仲連吁嗟乎祖龍竟受真
龍乳君山作風泰山雨勞君銜火驅蛇虎堯時未赭軒轅土

繆永謀

送朱錫鬯同高念祖北遊

北風吹塵暗城邑有客清晨叩門急故人別我將遠遊短衣匹
馬凌清秋他鄉未必無知己作客惟應有蒯緱男兒生年過三
十寄迹天涯如不及朱門豪貴少畱賓狹路逢人羞拜揖置酒
勸君歌莫悲狗屠燕市相追隨鼓刀安得從朱亥擊筑徒勞憶
漸離君不見蕭蕭易水金臺下落日平沙風滿野荆卿一去咸
陽宮誰是當年和歌者

俞瑒

送遠曲

郵亭二月生芳草鶯花爛熳臨官道拔劍悲歌酒未闌當筵送
客傷懷抱送君此去上太行太行古路臨羊腸車輪爲摧馬不
發十步九折心徬徨送君此去去黃河曲三門底柱遙相屬激沫
衝濤起白波臨流浩蕩傷局促山水之險安足驚世間反覆有
人情人情此日難爲說折腰齟齬爭相結王侯宅地起歌鐘車
馬紛紛趨下風堂前非復魏公子座上虛驚陳孟公近來交態
真堪媿貧賤相輕重財利縱使金多亦暫親還應勢改終相棄
長安市上多少年青絲絡馬黃金鞭呼鷹走狗遙相逐意氣傾
人亦偶然一朝利盡還疎索片言豈踐終身約世上豪華若轉
蓬憑君莫怨交情薄丈夫慷慨貴遇時偃蹇風塵徒爾爲淮陰

憚日初

觀王石谷畫山水圖歌

釣侶輕相笑梁市屠門人豈知春風滿眼橋邊柳爲君起舞君
知否所貴相期在寸心君今且盡盃中酒

琴川王郎年正少放筆往往稱神妙靈想寂與造化通幽襟獨
卷溪山照看君得意時令我長消魂石泓金池松麝薰抽毫欲
使羣峰奔王郎躊躇顧盼久不下素練忽破青天痕誰剪羅浮
烟驚落華陰碧勢偃研北松欲墜壁上石冉冉嵐氣蒸轉目無
留迹翻疑昨夜夢雨洗瀟湘屐營丘洪客不可攀人間久已無
青山此時窺圖發清賞高興半落雲沙間何處覓丹梯何方種
瑤草烟霞四壁吾將老援琴待埽十丈綃坐我雲邊弄仙島

殷麗

題崑山夏二桓次畫蘭

我聞夏仲昭畫竹不畫蘭畫出王子猷如對青琅玕惜無片紙
描香草令人對竹思蘭好今得先生九世孫筆底烟霞更縹緲
六月江邨歲庚戌怪雨盲風蔽天日日長吟松鶴堂社開萍
水羣公集于時夏子江上來主人放鶴松關開推窗坐對一庭
綠研池纔洗無纖埃窗虛研淨三盃酒夏子神來出身手分得
王孫九畹餘染成便面風生肘祖畫竹孫畫蘭一家能事風流
傳已知君寫瀟湘意更乞家藏一幅看

毛達

帝舜彈琴臺

在安邑縣西南十五里中條山下鹽池之上

海光樓下彈琴臺臨池對坐條山隈朱絃一拂天顏開青桐入
手熏風來熏風來自條山裏颯颯微波縐池水銀山雪浪五月
間卷起層冰六十里六十里中水接天波光直與條山連彈琴
臺下如霜白連阡比井皆鹽田鹽田不事竈與錡咫尺條山熏
風起但願聖人無疾病日日登臺調纖指

梁以樟

嚴陵瀨

嚴陵瀨頭清且泚水中照見魴與鯉持竿欲釣不下指作書爲
報漢天子足加帝腹吾往矣昨日江頭足方洗隆中一呼臥龍
起南陽富春竟誰是方干南去白雲深日莫誰爲梁父吟水中
魴鯉知吾心

張養重

雨中黃大宗設蔬茗邀南菴山亭看梅同湘草達士
新水平厓四五尺滿山春雨愁花溼水邊亭子面迎花看花人

起當窗立低垂弱柳麴塵新沉沉烟霧黃鸝澀茶聲暫歇雨霏
微登山路仄攀條入驚動山間鳥雀飛踏花翻落霑僧壁

萬任

劉少男招同雷鳳山劉昇公看菊

客來重上鳳山頭鳳山主人愛客留客來不向山中住主人燒
笋更煨芋謂客緩歌歸去來階前且看菊花開好花相對如良
友忍使劉伶不醉酒明年此日開此花花開知是阿誰家花下
殷勤謝主人花在秋看更勝春賞花須及未開前花謝何人解
酒錢君不見下郝廷尉門前客來來去去無顏色

陳維崧

楊枝曲

人生花月不嘗有眼前况見青青柳人生離別將奈何可憐復
唱楊枝歌僕本傷心人闌入揚州路風流前輩馬扶風後堂絲
管留髡住婆娑門舞白翎雀開元弟子黃幡綽緩舞珊珊屏後
來嬌歌嫋嫋燈前落就中誰更得人情弱質輕軀近長成詢來
知是楊家子我取楊枝作小名麴塵染就黃金勒和烟和雨窗
前拂文通久號斷腸人楊枝可是消魂物楊枝楊枝難重陳與
爾相依春復春永豐坊裏難栽汝京兆街邊最縮人我作楊枝
歌一爲楊枝譜半植淡宮半道旁古來只有楊枝苦細問楊枝
誰最都御溝西望翠模糊棲來興慶池中鳥藏得昭陽殿裏鳥
高樓更憶名花萼楊枝此地偏飄泊公子隄前籠玉鞭美人樓
上寒珠箔愁人愁殺是離亭送客楊枝二月青顰罷蛾眉君不
見吹殘玉笛舊曾聽驚心猶是春江渡鶯黃染就渾無數贏得
榆錢號沈充那堪柳色如張緒楊枝楊枝勿復嗟爾今生長在

侯家教得琵琶蒙主惜唱成穆護有人誇我今亦是白楊樹十
圍擁腫心空處雨打風吹祇自憐長條短葉關官路

李沂

刈薪歌

今年水大薪難取蘆花水面蘆水底尺五鎌刀丈二柄竟日一
人十束止辛勤餬口豈能長尚憂妻子饑凍死黑雲滿天身亂
飛屋西望船船未歸

歸莊

崑山石歌

昔之崑山出良璧今之崑山產奇石出璧之山流沙中產奇石
者在江東江東之山良秀絕歷代人才多英傑靈氣旁流到物
產石狀離奇色明潔神工鬼鑿斲千年雞骨桃花皆天然

骨片爲上桃
花紋次之

側成墮山立成峰大盈數尺小如拳奇石由來爲

世重米顛下拜東坡供今日東南膏髓竭猶幸此石不入貢貴
玉賤石非通論三獻三刖千古恨石有高名無所求終老山中
亦無怨世道方看玉碎時此石休教更銜奇嗟爾崑山之石今
已同頑石不勞朱覲來蹤迹

董道權

雪中答李杲堂

鄢陵孝廉重然諾約我浚秋醉桑落先人有爰宦并州我欲從
之客雁丘高堂有母闕甘旨負米何辭數千里杲堂李子憂我
閉門饑欲炊告以遠行爲色喜酌我黃金罍贈我青銅錢低回
不忍別此別須經年袖君之錢醉君酒城東城北頻回首歸來
兒女候柴門笑指餅中不盈斗牽衣問我欲何之今年豐熟仍

苦饑爺未出門共爺語爺出門去啼向誰示兒袖中錢故人佐
行李移與易米薪且以救妻子量米數薪堪作數日食買舟無
資行不得他日仍登李子堂李子爲我作歌聲蒼涼曳履依然
守蓬草得酒且與傾壺觴昨夜雪花如掌大草閣嚴寒只僵臥
午餘日色照西窗起把君詩讀幾過窗前冰雪消有時惟有故
人顏色長相思

謁史相公墓

揚州三月花滿枝家家壁上治春詩

王阮亭司李揚州于甲辰三月招諸布衣脩禊紅橋

各賦治春詩二十四首

江南客來花未落憑弔傷心轉蕭索蕭梁遺籍杳

難求若箇重開文選樓隋皇蹤迹今日埽玉鈞斜橫怨芳草東
山故宅廣川祠璇題碧瓦相參差可見男兒尚功德千秋萬歲
還廟食憶我行年十三四聽說揚州乙酉事相公被甲歿孤城

同歿百萬無怨聲金陵諸臣公獨苦得葬衣冠一杯土屈指春

秋二十年墓旁榆柳叅青天紅橋脩禊多詞客誰拜先生墓前

石我寓梅下嶺下寺經過細數碑陰字豫章王翁此勒銘

墓碑爲豫

章王于一先生所書

霜顙淚眼摩黃庭歲在丙申莫春月我父偕翁奠肴

核只今俱作墓中人西臺往事徒酸辛吁嗟乎相公被甲何時
卸猶戰城南風雨夜

王麟爻同宿客舍志感

廣陵城中夜擊柝廣陵城頭啼烏鵲爾我相逢話正繁童僕無
情睡先著微風忽起搖燭光輕寒稍覺侵衣裳鼓聲坎坎下三
四解衣滅燭眠匡牀與君展轉各無寐細數年來不得志爲惜
天涯此日身轉憶先人舊時事君家曾祖大司空清名文譽開
江東神光兩朝焚諫草燕齊百郡銘河功聞計朝廷倍惆悵特

命春官予祭葬卮酒分出天池漿墓道築就東園匠此時萬國
來車書至尊別殿夢華胥潼關烽火起倉卒延秋龍種爭獻歆
若翁司空冢孫子身拜國恩心媿恥策馬請監丞相軍守城遂
同丞相歿此時君作懷中兒何處來尋馬革厥今踰二十善詞
賦蓼莪開卷徒傷悲吾翁若翁交最好吾翁賢書年獨早七篇
屢下南宮第一裘盡敝長安道負囊簪筆越王臺角弓鐵騎吳
山來白眼世上共誰語散髮江頭祇自哀閉門註易忘暮年把
酒讀史呼蒼天嗟我三十尚失意名山著述何時傳若翁遊魂
歸未得吾翁買土葬無力相逢此地喜欲狂相看今夜愁如累
披衣起坐聞荒雞欖槍在天明月低

高詠

西河篇贈毛大可

西河詞客小毛子相思夢隔西陵水年少才名動世人老大艱
難辭故里魯國毛萇是前身北海孫嵩稱知己春半相逢蕭水
濱佳句吟同施使君風塵隔歲愁偃蹇椒蘭滿袖揚清芬岸幘
狂呼驚座客簫鼓中流遲不發落花依霧宿春山畫舫橫波動
初月琉璃研匣翡翠牀新翻樂府按宮商解撥琵琶同謝尚能
吹玉笛似桓郎毛生四十年未老風流却憶淮南道臨邛故人
供帳新山陽吏部園亭好賦罷明河秋月篇秋河如練月娟娟
綺麗爭誇子夜曲流傳競寫雪濤箋毛生彩筆天賦與物或害
之翻愁苦山排雪齧截修鱗箭發銅牙摧繡羽屈子湘潭怨杜
蘅禰衡洲上悲鸚鵡白壁明珠未足誇眼中飛藿盡春華夜登
九天叫閭闔上帝棄之如蟲沙當盃聽我西河曲西飛白日天
傾斜

曹 釗

驛吏歎

驛中官常苦卑往來迎送無了期驛中馬常苦疲晝夜奔馳無
已時槽頭馬瘦不肯騎伸眉踞坐索常儀驛吏低顏前致辭呵
叱怒罵及鞭箠牽馬出門去馬瘦行路遲倒灰道旁問者誰饑
烏啞啞繞馬叫飛飛銜腸挂樹枝驛卒歸向驛吏語途中馬死
取有皮上官按簿查毛齒驛吏徬徨淚如絲借問此情那得知
嗚呼驛吏之苦安可為嗚呼驛吏之苦安可為

盛民譽

十八灘歌

豫章南來秋水多船行日日愁風波狂瀾怪石不可計辛苦長
年嗟奈何始自惶恐終天柱銅盤錫洲開五座大溜小溜經其

中棉津石灞灘無數

皆灘名

水底沉雲水面山船頭船尾聲潺湲

坐臥風波二百里推篷遠望回龍關雙江駐節有古驛向晚停
橈一休息極目憑闌天際看可憐何處無秋色秋色長空雁一
羣西風落葉不堪聞明朝又上虔州去回首江山但白雲

汪 楫

九疊谷

看山須入萬山裏揆奇須行萬山底

山底見天

苦不多鐵壁銀河插

空起斜日忽落崩厓高老樹突出當奔濤谷口作語谷中應彷彿
無數哀猿號窮途漫啜嗣宗哭顯壁初識章惇豪山鬼柳榆
吾何憾濟勝無具非其曹

洪厓井歌

古洞嗟呀碧波縐老人騎驢波上走翠巖頭陀頗好奇親見霜

蹄印井甃我來秋水正漫漫石闌汨沒鳴奔湍澄泓直下幾千
尺白日不到生空寒仰看飛瀑正來此烟霏雪擁何時已

何延年

清涼山

此山面目本來好更喜遊蹤此山少當年風景費沉吟寺鐘一
聲清一心上山望江光下山照潭影六朝賸得臙脂井井畔秋
英爛熳開秋聲生處足銜盃只解春風桃李路幾人曾爲菊花
來

釋照宗

廣陵天寧寺放生馬歌

梵王宮殿蕪城下細草如茵覆平野過客爭看玉腕驪居人說
是將軍馬蕪城昔時幕府開連營萬騎如雲雷此馬驍騰久無

敵夕趨河漢朝江淮蒼黃合圍塵四起食君芻秣爲君歿四蹄
突出疾如風獨護將軍還故壘將軍酌酒解銀鞍却顧汗血當
風寒方瞳飲羽紫燄落掩淚蕭條不忍看主人義重終別離開
拋鎖甲算歸期給孤園中惠養畢免向他人求葢帷障泥新解
氣猶盛却謝圍人事童行法窟聊藏獅子花空王爲指金鞭影
平生蹀躞無與前只今戰罷已三年奇毛拳縮長苦病骨骼堵
牆殊可憐空林白日恣酣臥獨眼如龍猶識路神駿惟應支遁
看舊恩不願孫陽顧當時同列半歿生骨肉狼籍沙場平大宛
花門滿天地齊郊楚塞方縱橫怪爾獨無千里志何爲伏櫪淮
南寺垂頭肯向朔風嘶烙印猶存漢家字君不見開元舞馬出
天廐范陽軍中爭上壽寶韉珠勒萬人騎老歿報恩知是誰

釋本源

湖中晚泛

欲斷不斷湖上雲欲落不落湖上雪山僧放舸湖上遊四望青山遠明滅一聲飛鳥鳴沙洲處處江城漾碧流收拾綸竿歸復去石橋南渡海天秋

釋弘智

與俞邵

高者高深者深平者平有溪有江有滄溟有日有月有列星或爲瞿塘太行阪或爲原野或都城蝴蝶丹青是誰染草木夭矯何多情蠹魚亦具神仙福大鼎正須新火烹天予手筆不可負只是莫與時人爭

寄曾止山

蒼梧冰舍投滴血匡廬竹關兩面鏤送君一篇不可說至今枕

子夢寒熱感恩只在潛龍訣隨寓垂簾路自別君住縣崖四壁絕黃龍白鷺關心切近聞遠遊挾短策其家日貧日好客且喜新詩變一格盍且輟軒憐羽翮若肯穿破玄黃眼青白得與亦可行蠻貊

送杓司歸響山

梅朗三之弟

吁乎噫君有響山胡不歸客遊江城寒且饑氣藪藪雪霏霏朔風發發撩人衣鷄鳩十載漫天飛真丹塵滿斜陽微西巖籬落如重圍隱士晚菘安得肥還是丘壑烟塵稀一松一菊何是非殘編猶可讀敝扇猶可揮半爐寒火魂相依茆草有骨霜無威蒼天自護雙柴扉

釋南潛

知章騎

有序

夏日在補船村漁父示予枝指生飲中八仙歌
卷自知章騎已下皆偽蹟感而賦知章騎一篇

知章騎鐵網碎挂珊瑚枝并州快剪猛截斷莫遣魚目相追隨
尚書殘闕那可續張霸小兒徒爾為君不見南村硬黃哀冊文
米家精騎隨覆軍

打松子

打松子揀長松枝高葉碎青玲瓏揀長松打松子人生合歎松
風裏山雲峩峩石齒齒聽松日飲松根水

釋大汕

錢塘八月觀潮

天地間有四大觀虞山拂水匡廬雲海登州海市錢塘八月潮而所謂錢塘潮者其勝有三一則水灌蛟門江勢奔湧迴溜相激直逼長空一則青山兩岸丹翠盈眸浪夾天風噴雲吐霧一則秋光下射水氣上升如白蛟舞雨明河瀉瀑鰲山出海水殿凌虛亂馬爭程羣鷺鼓翼殷雷響靈上下錯綜須臾千頃明珠

從萬丈銀壁而下又以遠岫出沒烟瀾隱現恍惚似瑤島神女乘鸞駕雀而至自午入暮夜氣清蒼地走天旋月明如鏡對此駭浪驚濤神魂不禁以歌自適

錢塘八月潮頭入直上空冥千百尺萬馬奔騰閃電鞭燭龍巨
天照白日水怪平推白嶽來觸着巨靈輕一劈劈開水殿起靈
鬣陰風陽燄濺天高蟄雷蛟雨響不住海立山奔歷亂號勢若
白蛟氣若虹大鵬激起扇秋風高翔碧漢驚羣鳥摩下層霄撼
毒龍杯視五湖小四海衝開六合壯心負鼉宮鱷窟一時迸上
下明珠滾不定恍惚鮫鮪織錦紋流波直上空梯磴或陷深兮
或突立參差奇險更莫測日落寒潮發夜光伊人天外無消息

道中歎

飛沙打面西風急白草黃狐相對立行行踏入霜月林秋雲滿
地寒光集脫葉飛揚大如手怪石參差禿如叟破廟離披凍鬼

神危橋傾圯落星斗一燈煙雨宿孤村村前村後古今墳長夜
鳥鴉作人語路傍鬼出自招魂

北邙歌

洛水蒼黃山月小君臣死葬青山老巨冢堆頭封樹稀寒狐長
夜眠秋草幾朝王霸幾英雄定鼎分茅蓋世功銅駝石馬餘威
在苔蝕殘碑爛鳥蟲霜聲慘澹松聲白金魚玉匣依精魄楓葉
離披鳳閣魂愁雲滿地麟臺客寒食無人拜北邙戰後山川盡
斷腸陰風蕩蕩飛沙冷野僧破寺立殘楊年年烟雨燐火濕龍
旌虎帳羣靈集有時甲士仗劍行有時紅鬼調箏立吁嗟乎楚
老臨風一弔古愧無濁酒澆黃土地下先生應知苦

釋能印

畫山水歌

孤松植巖際枝幹何蒼然中藏風雨聲涓涓鳴幽泉泉流不已
狂風作千山萬山皆蕭索忽然雲黑匡廬峰雷雨震驚龍出壑
亂藤修竹溪流淡攀蘿躡磴迷雲林瀑布如簾挂寒玉高人結
茅溪之陰開軒鑿雲竇結納良不苟梅福清真龔遂流工部詩
懷元亮酒曹將軍江都王虎頭韋偃爭鋒鋌酒酣耳熱興忽發
捉筆一掃煙雲忙放浪湖山飽形勝漢陵秦苑悲殘陽百派千
岐出一手南橫瘴海浮瀟湘或一丘或一壑磊落高懷無住著
游龍出水虎出山只一毫端移海岳名落人間不足多祇有胃
中礪礪難消磨將進酒爲君歌君不見秦臺賓客玉樓春吳宮
花草皆成塵石家金谷無消息惟有月明長照人

龍潭曲

二月龍潭春水綠蘼蕪煙暖鴛鴦浴彩鷁雙雙起畫橈朱樓十

二闌干曲玉簫金管發清謳二十年來此地遊朝暮琴尊臨水
閣主人頻典鸛鷖裘衍波箋寫蠅頭字刻燭分題良讌會楚舞
秦箏不足陳南湖花月東山伎那識崎嶇行路難紛紛得意向
長安金隄紫陌花爭艷笑倚吟鞭仔細看宦海浮沉幾遷謫王
楊貢禹俱陳迹十月霜高柿葉紅石坊猶挂司成額燕子樓空
酒肆存朱闌碧檻護苔痕徵君書畫銷兵火宗伯文章付子孫
君不見盤龍浦上潮聲急奔流直下搖空碧石鯨夜半吼西風
如此波濤行不得

